

四庫全書

經部

欽定四庫全書

經部

五禮通考卷一百四十一

詳校官太常寺少卿_臣陳桂森

給事中_臣溫常綬覆勘

總校官進士_臣繆琪

校對官中書_臣孫球

謄錄舉人_臣謝錫位

欽定四庫全書

五禮通考卷一百四十一

刑部尚書秦蕙田撰

嘉禮十四

朝禮

蕙田案周禮命婦朝女君則皇后之有朝尚
矣漢制自二千石夫人以上服蠶衣以朝晉
宋皆然唐永徽五年命婦朝於光順門其後

以朝官命婦雜處朝賀詔停開元禮載皇后
正旦冬至受外命婦朝儀於肅章門外齊班
然後入內殿行禮賀畢有會長慶以後則外
制皇親國戚之家及臣僚命婦遇節序慶賀
許入內進奉而已其朝賀太皇太后皇太后
禮同至於正旦冬至朝賀行禮之詳無聞焉
元正旦命婦則以常禮詣內殿行賀禮明正
旦冬至皇后御坤寧殿內使監官引内外命

婦入朝禮畢賜宴於後殿今具唐開元禮明
禮志集禮及歷代儀注用著于篇

宋書禮志自皇后至二千石命婦皆以蠶衣為朝服
隋書禮儀志後齊元日中宮朝會陳樂皇后褱衣乘輿
以出於昭陽殿坐定內外命婦拜皇后興妃主皆跪皇
后坐妃主皆起長公主一人前跪拜賀禮畢皇后入室
乃移幄坐於西廂皇后改服褕翟以出坐定公主一人
上壽訖就坐御酒食賜爵並如外朝會

後周皇后之服凡十有二等朝命婦則服褙衣食命婦歸寧則服鵝衣臨婦學及法道門命婦有時見命婦則蒼衣隋儀如後齊制而又有皇后受羣臣賀禮則皇后御座而內侍受羣臣拜以入承令而出羣臣拜而罷

皇后褱衣深青質織成領袖文以翬翟五采重行十二

等素紗內單黼領羅縠褱襟蔽膝

隨裳色用翟為章三等

大帶

隨衣

色朱裏紕其外上以朱錦下以綠錦紐約用青組

以青衣革帶青鞵烏

鵝以金飾白

玉佩玄組綬

章采尺寸與乘輿同

祭及朝會凡大事則服之

明集禮古者后夫人有房中之樂歌周南召南而不用鐘磬所以諷誦以事其君子而朝會之樂未聞焉隋初皇后之庭但設絲管大業以後始制鐘磬而猶不設鑄鐘

唐開元禮皇后正至受羣官朝賀

前一日尚寢率其屬設御幄座如外命婦朝儀守宮設次於宮城門外如常儀其日未明一刻諸衛各勒所部屯門列仗及陳布於肅章門外奉禮設文武羣官諸親

番客使等衛於宮城門外如廟堂之式典儀設文武羣

官位於肅章門外文東武西俱重行北面相對為首諸

親位於文武五品之下朝集使番客等分方位次如常

設典儀贊者位於羣官東北差退西向北上又設內給

事位羣官之北南向

若與外命婦同時朝則典儀於肅章門外設羣官等版位

文武

羣官依時刻集列門外俱就次各服其服

若與上臺同上朝賀則上

臺禮畢羣官仍朝服典謁引從納義門西行就版位

尚儀奏請中嚴六尚以下各

服其服俱詣內閣奉迎典儀率贊者先入就位典謁引

文武羣官入就位尚儀奏外辦皇后首飾褱衣以出即御南向坐侍御警蹕及設琮璽於御座並如常儀內謁者監引內給事出就南面典儀曰再拜贊者承傳文武羣官等俱再拜典儀引為首者一人進內給事前北面跪賀

詞至正並與賀皇帝同惟伏惟殿下與時同休為異耳

賀訖俛伏興典謁引

退復位羣官等皆再拜內謁者監引內給事入依式奏聞內給事承令出謁者監引內給事復南面位稱令旨羣官等皆再拜內給事宣令云履新之慶

冬至云履長之慶與

公等同之羣官等又再拜內謁者監引內給事入典謁
引羣官等尚儀前奏禮畢皇后降座以入侍衛警蹕如
常儀

皇后正至受外命婦朝賀并會 太皇太后皇太后受
羣臣外命婦朝賀禮並同

前二日本司宣攝內外各供其職前一日守宮設外命
婦次如常儀尚寢率其屬設御幄於皇后正殿北壁南
向又設命婦為首者脫烏席於西階前近西東向如式

司樂展宮懸之樂於殿庭設麾於殿上西階之西東向
內僕進重翟以下於肅章門外道東西向北上司贊設
命婦版位於殿庭大長公主以下在東太夫人以下在
西諸親婦女以下

宗親在東
異姓在西

俱重行北面相對為首內

謁者設外命婦等位於肅章門外大長公主以下於道
東太夫人以下於道西俱重行相向北上命婦有從夫
之爵無夫有從子之爵設司贊位於東階東南西向掌
贊二人位於司贊之南差退俱西向受朝日依時刻諸

衛勒所部屯門列仗及陳布於肅章門外如常儀外命婦等依時刻集到宮門外至下車所道西東向以車為次北上車次定命婦等皆降車內典引引之次各服其服尚儀奏請中嚴官官侍衛者皆朝服司寶奉琮寶依式俱詣內閣奉迎司樂帥女工人入就位典樂升就舉麾位司贊先入就位內典引引命婦俱就肅章門外位尚儀奏外辦皇后首飾褱衣以出警蹕如常儀皇后出自西房典樂舉麾奏正和之樂即御座南向坐司寶奉

琮寶置於御座如常偃麾樂止

凡樂皆典樂舉麾工鼓祝而後作偃麾要鼓而

後止司賓承引命婦以次入就位為首者初入門舒和樂

作至位樂止命婦等立定司贊曰再拜掌贊承傳外命

婦皆再拜司賓引為首者一人詣西階為首者初行樂

作至階樂止為首者脫舄升進當御座前北面跪賀稱

妾姓等言

賀詞與羣官同

賀訖起司賓引為首者降階納舄樂

作復位立定樂止司贊者曰再拜掌贊承傳外命婦等

皆再拜司言承前令降自西階諸命婦西北東面稱令

旨外命婦等皆再拜宣令曰履新之慶

冬至云履長之慶

夫人

等同之司贊者曰再拜掌贊承傳外命婦等皆再拜司賓以次引出為首者初行樂作出閤樂止內典引承引以出尚儀前奏禮畢還侍位皇后降座樂作入自東房侍衛警蹕如來儀樂止女工人退

會朝訖尚寢帥其屬鋪外命婦等之座於座上大長公主以下於御座東南重行西向太夫人以下於御座西南重行東向設升殿者座席於東西廊下皆如上儀

又量設脫舄席於東西階下尚食設壽罇於殿上東序之端西向有坫爵一於罇下設升殿者酒罇於東西廊下近北設廊下者酒罇各於其座之南皆有坫罍俱障以帷設訖司樂帥諸樂人就位內典引引外命婦俱詣肅章門外位尚儀奏外辦皇后首飾褱衣以出警蹕侍衛如常儀皇后出自西房典樂舉麾正和之樂作即御座南向坐司寶奉琮寶置於御座如常儀偃麾樂止司賓承引外命婦以次入就位為首者初入門樂作至位

樂止外命婦立定

若朝會別日贊拜如朝禮

司言前承令降諸命婦

西北南向稱令旨夫人等升席座司贊曰再拜贊者承傳外命婦等皆再拜訖司賓引外命婦應升殿者詣東西階樂作為首者至階樂止俱就席脫舄於階下以升司賓引為首者一人升階近東西面立以下各就席後立司賓引不升殿者詣東西廊下席後立上下立定司賓引為首者詣酒罇所北面立尚食酌酒一爵以授為首者司賓引為首者至御座前北向授尚食尚食受爵

進置御座前司賓引為首者退北面為首者跪奏稱妾

姓等言元正首祚

冬至云天
正長至

妾等不勝大慶謹上千萬

歲壽興再拜外命婦等皆再拜訖司言前承令宣令云
令旨夫人等同納景福外命婦等又再拜尚食取爵奉
進皇后舉酒樂作外命婦等皆三稱萬歲皇后舉酒訖
尚食受虛爵復於坵樂止司贊曰再拜掌贊承傳外命
婦等皆再拜司賓引為首者就席後立司贊曰就座掌
贊承傳外命婦等俱就位尚食進酒至階司贊曰酒至

興掌贊承傳外命婦等俱興立席後尚儀至階省酒尚
食奉酒進皇后舉酒樂作如常又行外命婦酒酒至司
贊曰再拜掌贊承傳外命婦等俱再拜受釐司贊曰就
座掌贊承傳外命婦等俱就座坐飲皇后舉酒訖尚食
受虛爵復於坵樂止觴行三周尚食奉御食食升階司
贊曰食至興掌贊承傳外命婦等皆起立席後尚食至
階省候尚食品嘗食訖以次進置御前又行命婦案御
不食及命婦案設食訖司贊曰就座掌贊承傳外命婦
先下訖不須興

等皆就席座皇后飯樂作外命婦等俱飯御食畢樂止
乃行酒遂設庶羞諸仗以次作若賜酒司言前承令詣
東階上西向稱賜酒階下掌贊承傳外命婦等皆起再
拜立受觶坐飲訖起立授虛觶又再拜就席坐酒行十
二徧會畢司贊曰可起掌贊承傳外命婦等皆起立席
後司賓引降各納鴈樂作俱引復階下位樂止其廊下
者仍立於席後立定司贊曰再拜掌贊承傳外命婦等
在位者皆再拜若有束帛則尚功帥其屬以束帛先立

於東西廂司言前承令降自西階詣命婦西北東面稱
令旨外命婦等皆再拜宣令訖外命婦等又再拜尚功
帥其屬以次受束帛訖外命婦等又再拜司賓引命婦
等以次出樂作出門樂止內典引承引次出尚儀前奏
禮畢遂還侍位皇后降座樂作入自東房警蹕侍衛如
來儀樂止

蕙田案周官內宰掌致后之賓客之禮注謂
諸侯夫人有會見王后之法故亦致禮焉然

則諸侯夫人朝於王后而王后與之行宴會
之禮者其來尚矣唐開元禮儀注獨詳明集
禮有宴會命婦之儀蓋本諸此

明集禮皇太子正旦朝賀皇后儀注

冬至壽
誕同

前期内使監於坤寧宮設皇后御座於正中設皇太子
幄次於王宮門外之東近南親王幄次於王宮門外近
南之東西其日設儀仗於露臺上及殿庭之東西設皇
太子親王拜位於露臺上正中及殿內正中司贊二人

位於露臺上拜位之北東西相向司賓二人位於司贊之南東西相向內贊二人位於殿內拜位之北東西相向樂工陳樂於王宮門外皇太子親王朝上位訖司賓引導仍具冕服至幄次內使監官啟知皇后首飾褱衣將出仗動樂作陞御座樂止司賓引導皇太子親王入就殿前拜位初行樂作至拜位樂止司賓二人分立於東西司贊唱鞠躬樂作拜興拜興拜興拜興平身樂止司賓引導皇太子親王俱進自殿東門樂作司賓伺於

門外內贊接引至於殿前拜位樂止內贊唱跪皇太子

跪親王皆跪皇太子稱長子某茲遇履端之節

冬至則云履長

之節壽旦則云茲遇母后殿下聖誕之辰謹率諸弟等恭上千歲壽謹率諸弟某王等恭

詣母后殿下稱賀內贊唱俛伏興平身皇太子親王皆

俛伏興平身內贊引皇太子親王自殿東門出樂作司

賓引復殿前拜位樂止司贊唱鞠躬樂作拜興拜興拜

興拜興平身樂止內使監官啟禮畢司贊唱禮畢皇后

興樂作至內閣門司賓引皇太子親王還幄次樂止

明史禮志中宮受朝儀惟唐開元禮有朝皇太后及皇
后受羣臣賀皇后會外命婦諸儀明制無皇后受羣臣
賀儀而皇妃以下正旦冬至朝賀儀則自洪武元年九
月詔定凡中宮朝賀內使監設皇后寶座于坤寧宮丹
陛儀仗內使執之殿上儀仗女使執之陳女樂於宮門
外設皇貴妃幄次於宮門外之西近北設公主幄次于
宮門外之東稍南設外命婦幄次于門外之南東西向
皇后服褱衣出閣仗動樂作陞座樂止司賓導外命婦

由東門入內道東西班侍立訖導皇貴妃衆妃由東門入至陞上拜位贊拜樂作四拜興樂止導由殿東門入樂作內贊接引至殿上拜位樂止贊跪妃皆跪皇貴妃致詞曰妾某氏等茲遇履端之節冬至則云履長恭詣皇后殿下稱賀致詞畢皆俯伏興樂作復位樂止贊拜樂作四拜興樂止降自東階出司賓導公主由東門入至陞上拜位以次立行禮如皇妃儀司賓導外命婦入殿前中道拜位贊拜如儀班首由西陞陞入殿西門樂

作內贊接引至殿上拜位班首及諸命婦皆跪班首致
詞曰某國夫人妾某氏等稱賀賀畢出復位司言跪承
旨由殿中門出立露臺之東南向稱有旨命婦皆跪司
言宣旨曰履端之慶與夫人等共之贊興司言奏宣旨
畢皇后興樂作入內閣門樂止諸命婦出太皇太后皇
太后朝賀儀同洪武二十六年重定中宮朝賀儀先日
女官設御座香案至日內官設儀仗陳女樂於丹陛東
西北向設箋案於殿東門命婦至宮門司賓引入就拜

位女官具服侍班尚宮尚儀等官詣內奉迎皇后具服
出作樂贊拜如前儀女官舉箋案由殿東門入樂作至
殿中樂止贊跪命婦皆跪贊宣箋目女官宣訖贊展箋
宣箋女官詣案前展宣訖舉案于殿東命婦皆興司賓
引班首由東階陞入殿東門樂作內贊引至殿中樂止
贊跪班首及諸命婦皆跪班首致詞訖皆興由西門出
贊拜及司言宣旨皆如儀禮畢千秋節致詞云茲遇千
秋令節謹詣皇后殿下稱賀不傳旨凡朔望命婦朝參

是日設御座于宮中陳儀仗女樂皇后陞座引禮女官引命婦入班文東武西各以夫品贊拜樂作四拜禮畢出陰雨大寒暑則免後命婦朝賀俱于仁智殿朝東宮妃儀如朝中宮不傳令

明集禮宴會命婦儀注

正旦冬至壽誕同

坤寧宮受朝賀畢內使監官仍於殿上陳設御座于殿庭及露臺上左右設儀仗及御座左右擎執如受朝之儀又於御座西畔設貴妃等六妃位東畔稍南設皇太

子妃王妃公主位於殿南左右第一行設一品外命婦
坐次左右第二行設二品命婦坐次左右第三行設三
品命婦坐次左右第四行設四品外命婦坐次以北為
上東西相向東西廡下設四品以下外命婦坐次以北
為上樂工於殿之南楹陳大樂細樂及諸舞隊設御酒
尊于殿之南楹正中設皇妃酒尊於御酒尊之西皇太
子妃王妃公主酒尊於御酒尊之東設外命婦酒尊於
殿門左右及東西兩廡御位司壺二人尚酒尚食二人

皇妃六人司壺一人奉酒奉食二人皇太子妃王妃公主司壺一人奉酒奉食二人殿上左右行每一行司壺二人奉酒奉食二人東西廡各有司壺供酒供食之人陳御食案於殿上正中及皇妃六位食案於殿上之西稍南皇太子妃王妃公主食案於殿上之東稍南外命婦食案東西廡命婦食案皆先設於本位前將宴請執事人各供事司賓引大小命婦各服常服侍立於殿門外之左右內使監官啟知皇后常服皇妃皇太子妃王

妃公主常服隨從出閤仗動樂作陞御座樂止司賓引
皇妃皇太子妃王妃公主入就位司賓引大小命婦入
各立于座位後丞相夫人率次命婦等舉御食案進於
御座前丞相夫人捧壽花進於御前二品外命婦各舉
食案進於皇妃皇太子妃王妃公主前進壽花於皇妃
皇太子妃王妃公主前大小命婦各就位坐奉御及諸
執事人分進壽花於殿內大小命婦及分進壽花於東
西廡命婦訖司壺於御前尚酒及皇妃皇太子妃王妃

公主前進酒內外命婦前各供酒樂作樂女北面立舉
手唱上酒飲畢樂止東西廡大小命婦前司壺各斟酒
如儀奉御於御座前尚食供食者於皇妃皇太子妃王
妃公主前及外命婦前各供食樂作樂女北面舉手唱
上食食畢樂止東西廡大小命婦前供食者各供食如
儀凡酒七行間進食五次上酒上食樂作樂止並如儀
樂或間用舞隊宴畢皇后興樂作侍從導引還宮如來
儀樂止司賓引大小命婦以次出

典彙洪武十四年七月皇后千秋節諸命婦朝賀於坤寧宮賜宴

永樂二年九月上召解縉黃淮胡廣胡儼楊榮楊士奇金幼孜諭之曰皇后數言欲召見爾七人命婦其令即赴柔儀殿見是日縉等妻入見中宮慰勞備至皆賜五品冠服及紗幣表裏三年四月上命禮部自今命婦雖大朝賀亦止於三品以上餘悉免之定著為令

宣德時楊士奇在內閣時夫人已故惟一婢侍巾櫛而已一日中宮有喜慶文武大臣命婦皆朝賀太后

聞士奇無命婦令左右召其婢至則諸命婦已退矣
太后見其貌既不揚衣服儉陋命妃嬪重為梳整易
內製首飾衣服而遣之且笑云此回楊先生
不能認矣翼曰命所司如制封之不為例

嘉靖三年二月興國太后千秋日命婦各上箋覲賀宴
資倍常

右皇后受賀

蕙田案皇太子受羣官賀儀漢以前無聞唐
開元禮正旦冬至則於大朝會之明日百官
朝集使等皆詣東宮行禮羣官再拜稱賀又

再拜皇太子有答後再拜之儀宋政和五禮
新儀正旦冬至三公賀前後皆再拜皇太子
俱答拜其中班首稱賀有承令宣答之制次
樞密院官賀又次受師傅保賓客賀並如上
儀次文武官官賀無宣答亦不答拜元正旦
則於大朝會之明日文武羣官以下常服至
東宮行四跪拜禮其千秋亦如之明正至奉
天殿朝畢皇太子於大本堂受三公賓客諭

德賀有答後再拜之禮百官詣東宮賀有稱
賀宣答而不答拜其賀箋魏吳質有上太子
箋然不專於慶賀也唐令百官上東宮箋式
于皇太子稱殿下自稱名不稱臣蓋始用於
慶賀矣宋箋式與唐同元旦及千秋在內
省院臺進箋赴詹事院收受在外行省亦然
其所屬五品以上第進所屬上司類進詹事
院皆稱名不稱臣明正至千秋羣官各進箋

稱賀外官則進於禮部其式參用唐制詳見
明集禮會典中

通典晉制皇帝會公卿座位定太子後至孫毓以為
羣臣不應起禮曰父在斯為子君在斯為臣侍坐於
所尊見同等不起皆以為尊無二上故有所厭之事
也昔衛綰不應漢景之召釋之正公門之法明太子
事同於羣臣羣臣亦統一於所事應依同等不起之
禮明帝太寧二年詔曰漢魏以來尊崇儲貳使官屬

稱臣朝臣咸拜此甚無謂今太子幼冲使臣先達將
今所習見謂之自然此其可以教之邪令内外通議
尚書令卞壺議以為春秋王太子不會盟禮同於君
皆所以重儲貳異正嫡苟奉之如君不得不拜矣太
子若存謙冲故宜答拜臣以為皇太子之立郊告天
地正位儲宮豈得同之皇子揖讓而已謂宜稽則漢
魏闔朝同拜從之

徐邈云東宮臣上表天朝既黃紙上太子用疏則用

白紙也北人有作符宏宮屬者云東宮臣上疏於太子用白紙太子答之用黃紙朝士率常牋上下死罪太子答之姓白亦有惶恐此似得中朝舊法

隋書禮儀志後周制正之二日皇太子南面列軒懸宮官朝賀及開皇初皇太子勇准故事張樂受朝宮臣及京官北面稱慶高祖謂之是後定儀注西面而坐惟宮臣稱慶臺官不復總集煬帝之為太子奏降章服宮官請不稱臣許之

唐開元禮皇太子元正冬至受羣臣賀

并會

前二日本司宣攝內外各供其職前一日典設郎設皇太子幄座於正殿東序西向守宮設羣官等次東宮朝堂伶官帥展軒懸之樂於殿庭以姑洗之均又設三鑄鐘姑洗夷則大呂各依其位設登歌以南呂之均及設麾于殿上並如常儀典設郎鋪羣官牀座于殿上文官三品以上於皇太子西南重行北向武官三品以上於皇太子西北重行南向俱以東為上朝集使三品以上

及都督刺史各依方於文武官之下設不升殿者座席
於殿庭東西廂文官四品五品於懸東六品以下於橫
街之南每等異位重行西向北上武官四品五品於懸
西六品以下於橫街之南當文官每等異位俱重行東
向北上朝集使非升殿者分方各依文武官當品之下
諸州使人分方各於朝集使之下亦如之諸親於四品
五品之下

宗親在東異姓親在西掌儀仍各設版位

奉禮設門外位於東宮

朝堂之前文官在東武官在西俱每等異位重行相向

北上諸親位於文武四品五品之下

宗親在東異姓親在西

設諸

州朝集使位東方南方於宗親之南每等異位重行西面西方北方於異姓親之南每等異位重行東面俱以北為上典膳量設罇於廊下近北設不升殿者酒罇各于其座之南皆有坫霽俱障以帷其日質明諸衛各率勒所部屯門列仗文武羣官依時刻集朝堂次各公服左庶子量時刻版奏請中嚴近仗就陳於門外諸侍衛之官各服其器服俱詣閣奉迎伶官帥工人二舞入就

位又伶官帥一人升就位舉麾掌儀帥贊者入就位吏

部兵部贊羣官俱出次通事舍人各引就門外位又舍

人引羣官非升殿者先入就位左庶子版奏外辦皇太

子著從省服

未冠則雙童髻

以出侍衛如常伶官帥舉麾奏承

和之樂皇太子即座西向坐偃麾樂止

凡樂皆伶官帥舉麾工鼓執而

後作偃麾要敵而後止掌儀一人升就西階上東面立贊者二人

立于階下通事舍人引羣官以次入就位公初入門舒

和之樂作左庶子前跪奏稱左庶子臣某言請殿下迎

公王興俛伏興還侍位皇太子降立于座後

若有三公諸伯叔則

降立於東階下西面公至階則升立詣於座後皇太子升降伶官舉麾樂作止如式公至階樂止

公以下升座者俱脫屣於階下

所司先設脫履席

通事舍人接

引羣官升就位立定掌儀唱再拜贊者承傳羣官上下

皆再拜訖通事舍人引羣官為首者一人進皇太子前

東面立賀稱元正首祚景福惟新伏惟皇太子殿下與

時同休

冬至賀云天正長至伏惟殿下與時同休

賀訖退復位皇太子答再

拜左庶子前承令進宣令訖羣官上下又再拜左庶子

前跪奏稱左庶子臣某言請坐俛伏興還侍位皇太子
坐掌儀唱就座贊者承傳羣官上下就座皆就座俛伏
坐伶官帥引歌者及琴瑟至階脫履於下升就位坐其
笙管者詣階間北面立典膳郎進酒至階掌儀唱酒至
興贊者承傳羣官上下皆俛伏興立席後左庶子到階
省酒典膳郎奉酒進皇太子舉酒食宮令又行羣官酒
酒至掌儀唱再拜贊者承傳羣官上下皆再拜

若皇太子遣侍

拜即止

羣官皆搢笏受解掌儀唱就坐贊者承傳羣官上

下皆就坐俛伏興飲皇太子初舉酒登歌作昭和之曲
典膳郎進受虛解復于坵登歌訖降復位觴行三周典
膳郎進食食升階左庶子到階省案掌儀唱食至興贊

者承傳羣官上下俛伏興立座後典膳郎品嘗食訖以

次進置皇太子前食宮令又行羣官案

皇太子若不食及宮臣案先下

訖不須興設食訖掌儀唱就座贊者承傳羣官上下皆就座

俛伏坐皇太子及飯奏休和之樂羣官上下俱飯皇太
子食畢樂止仍行酒遂設庶羞伶官帥引二舞以次入

酒行九徧會畢掌儀唱可起贊者承傳羣官上下皆俛
伏起立席後左庶子前跪奏稱左庶子臣某言請殿下
降座俛伏興還侍位皇太子降立於座後掌儀唱再拜
贊者承傳羣官上下皆再拜皇太子答再拜通事舍人

引羣官降納履以出公初出樂作

若有三公諸伯叔皇太子升降伶官帥舉

麾作止如式

公出門樂止左庶子前跪奏稱左庶子臣某言

請殿下升座俛伏興還侍位樂作皇太子升座樂止羣

官出畢

非升座者仍立於殿庭

左庶子前跪奏稱左庶子臣某言

禮畢俛伏興還侍位皇太子興樂作皇太子降座以入侍衛如來儀侍臣從至閣樂止又通事舍人引侍衛者以次出

皇太子元正冬至受宮臣朝賀

并會

前二日本司宣攝內外各供其職前一日典設郎設皇太子幄座于正殿東序西向衛尉設宮臣次于重明門外伶官出展軒懸之樂於殿庭以姑洗之均設麾於殿上西階之西又設為首者解劍席於懸西橫街之南並

如常儀設宮臣版位於懸南文東武西俱重行北面相對為首設典儀位於東階南贊者二人在南差退俱西向北上設宮臣門外位文官道東武官道西重行相向以北為上受朝其日未明三刻開諸宮殿門諸衛率各勒所部屯門列仗如常宮臣依時刻集重明門外各服其器服左庶子版奏請中嚴近仗就陳於閤外伶官帥工人入就位又伶官帥一人升就位諸侍衛之官各服其罷服俱詣閤奉迎典儀帥贊者先入就位通事

舍人引宮臣俱就門外位又舍人引六品以下先入就
位左庶子版奏外辦皇太子服遠遊冠絳紗袍以出左
右衛侍如常儀皇太子將出仗動伶官帥跪俛伏興舉
麾鼓祝奏永和之樂皇太子升自阼階即座西向坐偃
麾戛敔樂止通事舍人引宮臣五品以上以次入就位
宮臣初入門奏舒和之樂至位樂止宮臣立定典儀曰
再拜贊者承傳宮臣在位者皆再拜訖通事舍人引為
首者一人詣西階為首者初行樂作至解劍席後樂止

為首者就席解劍置於席俛伏興通事舍人引升階進

當皇太子座前東面跪賀

其賀詞與羣官同

俛伏興通事舍人

引降詣席後為首者跪著劍俛伏興樂作復懸南位樂止宮臣俱再拜左庶子前承令降詣宮臣西北東面稱令旨宮臣俱再拜宣令訖宮臣又再拜左庶子還侍位典儀曰再拜贊者承傳宮臣在位者皆再拜通事舍人以次引出還次為首者初行樂作出門樂止左庶子前跪奏稱左庶子臣某言禮畢俛伏興還侍位皇太子興

樂作降座入侍衛如來儀侍臣從至閣樂止

會 伶官帥登歌於殿上以南呂之均典設郎鋪宮臣
牀座於其殿上文官於皇太子幄座西南重行北向武
官於皇太子西北重行南向俱以東為上設不升殿者
座席于東西廊下設解劍席於懸西橫街之南俱以北
為上典設郎設壽罇於殿上西序之端東西有坫加爵
一於罇下又設升殿者酒罇於西廊下近北設殿下者
酒罇各於其座之南皆有坫罍俱障以帷設訖通事舍

人引宮臣出次俱就門外位左庶子奏外辦皇太子服
遠遊冠絳紗袍以出侍衛如常皇太子將出仗動樂作
皇太子升自阼階即座西向坐樂止典儀一人升就東
階上西面立通事舍人引文武宮臣以次入就位宮臣
初入門樂作為首者至位樂止宮臣立定

若朝會別日
設會贊拜如

朝禮

左庶子前承令降命宮臣升座位者皆再拜通事舍

人引應升殿者詣西階為首者初行樂作至解劍席樂
止宮臣各脫烏履跪解劍置於席上俛伏興通事舍人

引升階宮臣為首者一人升立於階西東向以下各就座後立于其位又通事舍人引廊下位者就座後上下立定典膳郎前跪稱典膳郎臣某言請賜宮臣上壽俛伏興左庶子稱令曰諾典膳郎退升詣酒罇東面立通事舍人引為首者詣酒罇之所北面立典膳郎酌酒一爵授為首者搢笏受爵通事舍人引為首者詣皇太子座前東面授左庶子左庶子受爵進置皇太子前為首者執笏通事舍人引為首者退東面跪稱某官臣等稽

首言正元首祚

冬至云天正長至

臣等不勝大慶謹上千萬壽

伏興再拜宮臣等上下再拜立於席後左庶子前承令
少退宣令訖宮臣上下又再拜左庶子取爵奉進皇太
子舉酒奏休和之樂宮臣上下皆舞蹈三稱萬歲皇太
子舉酒訖左庶子進受虛爵以授典膳郎典膳郎受爵
復於坵樂止初左庶子受虛爵殿上典儀唱再拜階下
贊者承傳宮臣上下皆再拜通事舍人引為首者就座
後立殿上典儀唱就座階下贊者承傳宮臣上下俱就

座俛伏興伶官帥引歌者及琴瑟至階脫屣於下升就
位坐又引笙管進詣階間北面立典膳郎進酒至階殿
上典儀唱酒至興階下贊者承傳宮臣上下皆俛伏起
立席後左庶子到階省酒典膳郎奉酒進皇太子舉酒
食會令及行宮臣酒至殿上典儀唱再拜階下贊者承
傳宮臣上下皆再拜俛伏興坐飲皇太子初舉酒登歌
作昭和之樂三終行觴三周典膳郎進食皇太子奏休
和之樂食畢樂止仍行酒設庶羞之奠如會羣官儀伶

官帥引諸伎以次入樂作若賜酒左庶子前承令詣東階上西向稱賜酒殿上典儀承傳階下贊者又承傳宮臣上下皆執笏俛伏起再拜播笏立受觶就座俛伏坐飲訖俛伏起受虛觶再拜執笏又再拜就座俛伏坐酒九行徧會畢殿上典儀唱可起階下贊者承傳宮臣上下皆俛伏起立席後通事舍人引宮臣降詣解劍席後跪著劍俛伏興納鳥履樂作復懸南位樂止位於東西廊下者仍立於席後立定典儀曰再拜贊者承傳宮臣

在位者皆再拜

廊下者拜於席後

諸伎俱作通事舍人引宮臣

以次出為首者初行樂作出門樂止左庶子跪奏稱左庶子臣某言禮畢俛伏興還侍位皇太子興奏永和之樂皇太子降座以入侍衛如來儀侍臣從至閣樂止

皇太子與師傅保相見

附

前一日衛尉設師傅保次于宮門外道南西向伶官帥展軒懸於殿庭以姑洗之均其日質明諸衛率各勒所部屯門列仗典儀設師傅保位於西階之西東

向三少位於師傅保之南少退俱東向北上太師太
傅太保及三少至宮門通事舍人引就次左庶子奏
請中嚴伶官帥工人就位又通事舍人引師傅保及
三少立於正殿門西差退俱東向左庶子奏外辦請
侍衛之官各服其罷服俱詣閣奉迎皇太子著從省
服以出左右侍衛如常儀永和之樂作至東階下西
面立樂止通事舍人引師傅保三少入就位樂作如
常師傅保立定皇太子再拜師傅保答再拜

若三少
特見則

三少通事舍人引師傅保出樂作止如常師傅保出門左庶子前跪稱左庶子臣某言禮畢皇太子左右侍衛及樂奏如來儀

皇太子受朝集使參辭

附

前一日典設郎設皇太子幄座於東宮正殿東序西向又設宮臣次及朝集使次于重明門外其日質明所司設宮臣及朝集使次于殿庭諸衛率各勒所部屯門列仗東宮文武官依時刻集朝堂就位服袴褶

朝集使並就次服公服左庶子量時刻版奏請中嚴
近仗就陳於閣外侍衛之官各服其器服就閣奉迎
通事舍人各令引羣官及朝集使就門外位左庶子
版奏外辦皇太子常服即座西向坐通事舍人引宮
臣入就位如常典儀曰再拜贊者承傳在位者皆再
拜又通事舍人令引朝集使橫行北面立定掌儀曰
再拜朝集使皆再拜通事舍人承令詣朝集使前稱
有令朝集使皆再拜宣令訖又再拜舍人引宮臣以

次出其辭禮亦如之

宋政和五禮新儀

前一日有司於東門外量地之宜設三公以下文武羣官等次如常儀典儀設皇太子答拜褥位於階下南向又設文武羣官版位于門之外其日禮直官舍人先引三公以下文武羣臣以次入就位立定禮直官舍人引左庶子詣皇太子前跪請內嚴少頃又言外備內侍蹇簾皇太子常服出次左右侍衛如常儀皇太子降階詣

南向褥位典儀曰再拜贊者承傳曰再拜三公以下皆

再拜皇太子答拜班首少前稱賀云元正首祚

冬至云
天正長

至景福維新伏惟皇太子殿下與時同休賀訖少退復

位左庶子前承命詣羣臣前答云元正首祚

冬至云
天正長至

與公等均慶典儀曰再拜班首以下皆再拜皇太子答

拜訖禮直官通事舍人引三公以下文武百官以次出

內侍引皇太子升階還次降簾侍衛如常儀少頃禮直

官舍人引知樞密院官以下入就位立定內侍引皇太

子降階詣南向褥位樞密以下參賀如上儀訖退次引
師傅保賓客以下入就位參賀如上儀師傅保以下以
次出內侍引皇太子升座禮直官引文武官官入就位
重行北向立典儀曰再拜在位官皆再拜左庶子少前
跪言具官某言元正首祚冬至云天
正長至伏惟皇太子殿下
與時同休俛伏興復位典儀曰再拜在位者皆再拜分
東西序立左庶子少前跪言禮畢左右近侍降簾皇太
子降坐宮官退左右侍衛以次出

宋史禮志皇太子與百官相見至道元年有司言百官見皇太子自兩省五品尚書省御史臺四品諸司三品以上皆答拜餘悉受拜官官自左右庶子以下悉用參見之儀其宴會位在王公上與師傅保相見政和新儀前一日所司設師傅保以下次於宮門外道西南向設軒架之樂於殿庭近南北向其日質明諸衛率各勒所部屯門列仗典謁設皇太子位于殿東階下西向設師傅保位于殿西階之西三少位於傅保之南稍却俱東

向北上師傅保以下俱朝服至宮門通事舍人引就次
左庶子請內嚴通事舍人引師傅保立于正殿門之西
三少在其南稍却俱東向北上左庶子言外備諸侍奉
之官各服其器服俱詣閭奉迎皇太子朝服以出左右
侍衛如常儀軒架作翼安之樂至東階下西向立樂止
通事舍人引師傅保及三少入就位軒架作正安之樂
至位樂止皇太子再拜師傅保以下答拜

若三少特見
則三少先拜

通事舍人引師傅保以下出軒架正安之樂作出門樂

止左庶子前跪稱左庶子某言禮畢皇太子入左右侍衛及樂作如來儀

徐氏乾學曰案周制王用宮懸諸侯用軒懸而無王世子用樂之文禮記云三王教世子必以禮樂則東宮之宜設樂明矣梁武帝天監中東宮新成皇太子宴會司馬瑩請奏金石軒架之樂賀瑒請備文武二舞正旦上壽奏介雅庶幾先王之制乎隋皇太子正旦張樂受賀唐制皇太子樂用軒懸舞用六佾明東宮受賀用大樂則歷代之設樂可攷而知也

金史禮志皇太子與百官相見儀 三師三公欄子內

北向躬揖班首稍前奉候皇太子離位稍前正南立答

揖宰執及一品職事官於欄子北向躬揖答揖如前二品職事官欄子外向南躬揖皇太子起揖三品職事官露階稍南躬揖皇太子坐揖四品以下職事官宮庭下躬揖跪問候皇太子坐受太子太傅太保與隨朝三師同東宮三少與隨朝二品同詹事以下並在庭下面北每品重行以東為上再拜稍前問候又再拜皇太子坐受七年定制皇太子赴朝許與親王宰執相見餘官宗室並迴避後亦許與樞密使副御史大夫判宗正東

宮三師相見 九年定制凡皇太子出於都門三里外
設褥位三公宰執以下公服重行立皇太子便服三公
宰執以下鞠躬班首致辭云青宮萬福再拜皇太子答
拜退迎送皆同 章宗時禮部尚書張行簡言唐制僕
射宰相上日百官通班致賀降階答拜國朝皇太子元
正生日三師三公宰執以下須羣官同班拜賀皇太子
立受再答拜今尚書省宰執上日分六品以下別為一
班揖賀宰執坐舉手答揖近於坐受也宰執受賀其禮

乃重於皇太子恐於義未安別嫌明微禮之大節伏請
宰執上日令三品以下官同班賀宰執起立依見三品
官儀式通答揖上曰此事何不早辨正之如都省擅行
卿正之是矣行簡對曰禮部蓋嘗參酌古今典禮擬定
儀式省廷不敢輒改以奏下尚書省議遂用之宰執上
日三品以下羣官通班賀起立答拜自此始

元典章正旦於大朝會之明日文武羣官以常服至東
宮行賀禮皇太子居偏殿南向坐羣官自丞相以下以

次入北面行四跪拜禮

明史禮志朝賀東宮儀漢以前無聞隋文帝時冬至百官朝太子張樂受賀唐制宮臣參賀皇太子皆舞蹈開元始罷其禮故事百官詣皇太子止稱名惟宮臣稱臣明洪武十四年給事中鄭相同請如古制詔下羣臣議編修吳沈等議曰東宮國之大本所以繼聖體而承天位也臣子尊敬之禮不得有二請凡啓事東宮者稱臣如故從之凡朝東宮前期典璽官設皇太子座於文華

殿錦衣衛設儀仗於殿外教坊司陳大樂於文華門內
東西北向府軍衛列甲士旗幟於門外錦衣衛設將軍
十二人於殿中門外及文華門外東西向儀禮司官設
箋案於殿東門外設百官拜位於殿下東西設傳令宣
箋等官位於殿內東西是日百官詣文華門外導引官
啓外備皇太子具冕服出樂作陞座樂止百官入贊拜
樂作四拜興樂止丞相陞自西階至殿內拜位俱跪丞
相致詞曰某等茲遇三陽開泰萬物維新敬惟皇太子

殿下茂膺景福畢俛伏興復位舍人舉箋案入殿中其
捧箋展箋宣箋傳令畧與皇后同令曰履茲三陽願同
嘉慶餘俱如儀冬至致詞則易律應黃鐘日當長至傳
令則易履長之節千秋節致詞則云茲遇皇太子殿下
壽誕之辰謹率文武羣官敬祝千歲壽不傳令凡朔望
百官朝退詣文華殿門外東西立皇太子陞殿樂作百
官行一拜禮其謝恩見辭官亦行禮洪武元年十二月
帝以東宮師傅皆勲舊大臣當待以殊禮命議三師朝

賀東宮儀禮官議曰唐制羣臣朝賀東宮行四拜禮皇太子答後二拜三公朝賀前後俱答拜近代答拜之禮不行而三師之禮不可不重今擬凡大朝賀設皇太子座於大本堂設答拜褥位於堂中設三師賓客諭德拜位於堂前皇太子常服陞座三師賓客常服入就位北向立皇太子起立南向贊四拜皇太子答後二拜六年詔百官朝見太子朝服去蔽膝及佩二十九年詔廷臣議親王見東宮儀禮官議諸王來見設皇太子位於正

殿中設諸王拜位于殿門外及殿內設王府官拜位于庭中道上之東西設百官侍立位于庭中東西向至日列甲士陳儀仗設樂如常諸王詣東宮門外幄次皇太子常服出樂作陞座樂止引禮導諸王入就殿門外位初行樂作就位樂止導詣殿東門入樂作內贊引至位北向立樂止贊跪王與王府官皆跪致詞曰茲遇某節恭詣皇太子殿下致詞畢王與王府官皆俛伏興樂作復位樂止贊拜樂作王與王府官皆四拜興樂止禮畢王及各官以次出王

至後殿叙家人禮東宮及王皆常服王由文華殿東門入
至後殿王西向東宮南向相見禮畢叙坐東宮正中南面
諸王列於東西嘉靖二十八年禮部奏故事皇太子受朝
賀設座文華殿中今易黃瓦似應避尊帝曰東宮受賀位
當設文華門之左南向然侍衛未備已之隆慶二年冊皇
太子詔于文華殿門東間設座受賀

右皇太子受賀

宋史禮志皇太后臨朝聽政乾興元年真宗崩遺旨以

皇帝尚幼軍國事兼權取皇太后處分宰相率百官稱
賀復前奉慰又慰皇太后於簾前有司詳定儀式內東
門拜表合差入內都知一員跪授傳進皇太后所降批
答首書覽表具之末云所請宜許或不許初丁謂定皇
太后稱予中書與禮院參議每下制令稱予便殿處分
稱吾皇太后詔止稱吾與皇帝並御承明殿垂簾決事
百官表賀英宗即位輔臣請與皇太后權同聽政禮院
議自四月內東門小殿垂簾兩府合班起居以次奏事

非時召學士亦許至小殿時帝以疾權居柔儀殿東閣
西室太后垂簾處分稱吾惟兩府日入候問聖體因奏
政事退詣小殿簾外覆奏太后帝疾間御前後殿聽政
兩府退朝猶于小殿覆奏哲宗即位皇太后權同聽政
三省樞密院案儀注未釋服以前遇隻日皇帝御迎陽
門日參官並赴起居依例奏事每五日遇隻日于迎陽
門垂簾皇帝坐于簾內之北宰執奏事則權屏去左右
侍衛事有機速許非時請對及賜召宣亦許升殿禮部

御史臺閤門奏討論御殿及垂簾儀制每朔望六參皇
帝御前殿百官起居三省樞密院奏事應見謝辭班退
各令詣內東門進榜子皇帝雙日御延和殿垂簾日參
官起居太皇太后移班少西起居皇帝並再拜三省樞
密院奏事三日以上四拜不舞蹈候祔廟畢起居如常
儀簾前通事以內侍殿下以閤門吏部磨勘奉舉人垂
簾日引應見謝辭臣僚遇朔望參日不坐並先詣殿門
次內東門應擡賜者並門賜之於是帝御迎陽門幄殿


同太皇太后垂簾宰臣親王以下合班起居常制分班十六至是合班以閤門奏請故也禮官請如有祥瑞邊捷宰臣以下紫宸殿稱賀皇帝畢赴內東門賀太皇太后從之徽宗即位皇太后權同聽政三省樞密院聚議故事嘉祐末英宗請慈聖同聽政五月同御內東門小殿垂簾至七月十三日英宗間日御前後殿輔臣奏事退詣內東門簾前覆奏又故事惟慈聖不立生辰節名不遣使契丹若天聖元豐則御殿垂簾立生辰節名遣

使與契丹往還及避家諱等曾布曰今上長君豈可垂簾聽政請如嘉祐故事蔡卞曰天聖元豐與今日皆遺制處分非嘉祐比布曰今日之事雖載遺制實出自德音又皆長君正與嘉祐事相似有旨依嘉祐治平故事布語同列曰奏事先太后次覆奏皇帝如今日所得旨遂為定式矣尋以哲宗靈駕發引太后手書罷同聽斷焉

蕙田案太后臨朝聽政非常禮也列代史傳

皆不載其儀惟宋史有之今附于末

右皇太后臨朝聽政



五禮通考卷一百四十一

欽定四庫全書

經部

五禮通考卷一百四十二

詳校官太常寺少卿_臣陳桂森

給事中_臣溫常綬覆勘

總校官進士_臣繆琪

校對官中書_臣孫球

謄錄舉人_臣謝錫位

欽定四庫全書

五禮通考卷一百四十二

刑部尚書秦蕙田撰

嘉禮十五

尊親禮

蕙田案聖王以孝治天下尊親之典為最鉅
創業嗣統之君即位以後莫不以斯為首務
然其禮見於吉禮者有三始祖配天一也帝

后祔廟二也追崇本生三也已分見祀天廟
制后妃私親廟各門今叙追尊之制內禪起
居之儀母后上冊之禮以廣盡孝之義焉

禮記大傳牧之野武王之大事也追王大王亶父王季

歷文王昌不以卑臨尊也

注不用諸侯之號臨天子也文王稱王早矣於殷猶為諸

侯於是著焉

疏土無二王殷紂尚存即為早所以早稱王者案中侯我應云我稱非早一民固下周本紀云

文王受命六年立靈臺布王號於時稱王九十六也故文王世子云君王其終撫諸是也文王既稱王文王生

雖稱王號稱猶未定故武王追王乃定之耳

中庸周公成文武之德追王大王王季上祀先公以天

子之禮

注追王太王王季者以王迹起焉先公組紃以上至后稷也

疏詩頌閟宮云太王居岐之陽

實始翦商是王迹起也

呂氏大臨曰追王之禮古所無有其出於周公乎太王避狄去邠之岐則王業始基之矣王季成大王之業至文王受命作周武王壹戎衣而有天下纘大王王季文王之緒而已

陳氏祥道曰大傳言武王追王太王王季文武有追王之
言周公成文武之德追王太王王季文武有追王之
志周公行追王之事也司馬遷言文王有正朔追尊

太王王季妄矣書曰大王肇基王迹王季其勤王家
詩曰實維太王實始翦商則文王所以三分天下有
其二者其始乃自太王王季也武王所以得天下其
成乃自文王也詩曰周雖舊邦其命維新又曰文王
受命有此武功書曰九年大統未集又曰集大命於
厥躬記稱武王曰君王其終撫諸春秋書王正月公
羊曰王者孰謂謂文王也觀此則宜若文王既受命
作周改元稱王矣而記謂武王周公追王之何也蓋

於是時天下之訟獄者不之紂而之文王謳歌者不謳歌紂而謳歌文王則虞芮質成之後天固已命之矣然作周而未成有所統而未集不幸九年而終至此武王周公所以正其名而追之也觀祖伊稱文王以西伯武王稱文王以文考則文王未嘗稱王可知也

游氏酢曰武王於泰誓三篇稱文王為文考至武成而柴望然後稱文考為文王世之說者因中庸無追

王文王之文遂謂文王自稱王豈未嘗考泰誓武成之書乎君臣之分猶天尊地卑紂未可去而文王稱王是二天子也服事殷之道固如是耶書所謂大統未集者後世以虞芮質厥成為文王受命之始故也當六國時秦固已雄長天下而周之號微矣辛垣衍欲帝秦魯仲連以片言折之衍不敢復出口蓋名分之嚴如此故以曹操之奸雄逡巡於獻帝之末而不得逞彼蓋知利害之實也曾謂至德如文王一言一

動順帝之則而反盜虛名而拂天理乎且武王觀政於商而須假之五年非偽為也使紂一日有悛心則武王當與天下共尊之必無牧野之事然則文王已稱之名將安所歸乎此天下之大戒故不得不辨

蕙田案文王之不稱王自是一定本無可疑中庸之不及文王先儒謂武王業已追王而尚未及太王王季故周公成之其說近是史記及疏殊非至理陳氏游氏辨之極的

呂氏祖謙曰謂不以卑臨尊此出於後來漢儒之說
無疑而非追王之本意也嘗考之武成三王皆肇基
之主所以追王之也

蕙田案東萊之論是也記以諸侯為卑天子
為尊非聖賢之意

漢書高祖本紀十年八月令諸侯王皆立太上皇廟
班固贊曰漢帝本系出自唐帝降及於周在秦作劉
涉魏而東遂為豐公豐公益太上皇父其遷日淺墳

墓在豐鮮焉及高祖即位置祠祀官則有秦晉梁荆

之巫

應劭曰先人所在之國悉致祠巫祝博求神靈之意也文穎曰巫掌神之位次者也范氏世事

於晉故祠祀有晉巫范會支庶留秦為劉氏故有秦巫劉氏隨魏都大梁故有梁巫後徙豐豐屬荆故有荆巫也
世祠天地綴之以祀豈不信哉

文獻通考馬氏曰漢高帝承秦之敝禮制隳廢既即天子位而七廟未嘗立至太上皇崩始詔郡國立廟而皇祖以上無聞焉班史高紀贊始有豐公之名且言致祠祀有秦晉荆梁之巫觀注家所言則是自晉而秦自秦而梁自梁而荆似各有祖廟各有巫以主其祀事然郊祀志言梁巫祀天地天社天水房中堂上之屬晉巫祠五帝東君雲中君巫社巫祠族人炊之屬秦巫祠社主巫保族彙之屬荆巫祠堂下巫先

司命旄廉之屬則諸巫所掌者乃祀典神祇之祠非祖廟也所謂世祠天地綴之以祀者豈是以諸祖配諸神而祠之而各處有巫主其事耶不可得而詳也

蔡邕獨斷漢高祖得天下而父在上尊號曰太上皇不言帝非天子也

續漢書祭祀志光武帝建武三年正月立親廟祀父南頓君以上至舂陵節侯南頓君稱皇考鉅鹿都尉稱皇祖考鬱林太守稱皇曾祖考節侯稱皇高祖考

蕙田案光武中興崛起承奉大宗據昭穆之

次以元帝為父故南頓君以上四世僅奉祠園寢未有追尊之典與為人後之禮合先儒皆以為不可及也

晉書禮志延康元年魏文帝繼王位追尊皇祖為太王夫人曰太王后黃初元年受禪又追尊曰太皇帝皇考武王曰武皇帝

明帝太和三年追尊高祖大長秋曰高皇夫人吳氏曰高皇后

通典魏文帝即王位尚書令桓階等奏臣聞尊祖敬宗古之大義故六代之君未嘗不追崇始祖顯彰所出先王應期撥亂啟魏大業然禰廟未有異號非崇孝敬示無窮之義也太尉公侯宜有尊號所以表功崇德發事顯名者也故易言乾坤皆曰大德言大人與天地合臣等以為太尉公侯誕育聖哲以濟羣品可謂資始其德之號莫過於太王詔曰前奏以朝車迎中常侍大長秋特進君侯神主然君不宜但依故爵乘朝車也禮有尊

親之義為可依諸王比更議博士祭酒孫欽等議案春秋之義五等諸侯卒葬皆稱公乃與王者之後宋公同號然臣子褒崇其君父以此言之中常侍大長秋特進君侯誕育太皇篤生武王奄有四方其功德之號莫過太王今迎神主宜乘王車又宜先遣使者上謚號為太王於是漢帝追謚為太王及受禪追尊太王為太皇帝考武王為武皇帝尊王太后為皇太后明帝泰和三年六月司空陳羣等議以為周武追尊太王王季文王皆

為王是時周天子以王為號追尊即同故謂不以卑臨尊也魏以皇帝為號今追號皇曾祖中常侍大長秋特進君為王乃以卑臨尊也故漢祖尊其父為太上皇自是以後諸侯為帝者皆尊其父為皇也大長秋特進君宜號高皇載主宜以金根車可遣大鴻臚持節乘大使車從駟騎奉印綬即鄴廟以太牢告祠從之又詔曰蓋聞尊嚴祖考所以成湯文武實造商周克昌王業而詩書之義追尊稷禹自我魏室之承天序既發跡於高皇

高皇之父處士君精神幽遠號稱罔記非所以崇孝重
本也其令公卿以下會議號謚侍中劉奕議周王所以
后稷為祖者以其唐之諸侯佐堯有大功名在祀典故
也至於漢氏之初追謚之義不過其父上比周室則大
魏發跡自高皇而始下論漢氏則追謚之禮不及其祖
奕思以為追尊之義宜齊高皇而已侍中繆襲以為元
者一也首也氣之初也是以周文演易以冠四德仲尼
作春秋以統三正又謚法曰行義悅人曰元尊仁貴德

曰元處士君宜追加謚號曰元皇太傅鍾繇議案禮小
記曰親親以三為五以五為九上殺下殺旁殺而親畢
矣乃唐堯之所以敦叙於九族也其禮上殺於五非不
孝敬於祖也下殺於五非不慈愛於其孫也旁殺於五
非不篤友於昆弟也故為族屬以禮殺之處士君其數
在六於屬已盡其廟當毀其主當遷今若追崇帝王之
號天下素不聞其受命之符則是武皇帝櫛風沐雨勤
勞天下為非功也推以人情普天率土不襲此議處士

君明神不安此禮今諸博士以禮斷之其義可從詔從之

蕙田案追王為尊親第一事自魏以前無有稱帝者稱之自魏始鍾繇以小記斷追尊之代於周追王義合劉侍中議亦不可廢

宋書禮志孫權立堅廟尊曰始祖

晉書禮志武帝泰始元年追尊皇祖宣王曰宣皇帝伯考景王曰景皇帝皇考文王曰文皇帝宣王妃張氏為

宣穆皇后尊太妃王氏為皇太后

宋書武帝本紀永初元年即位追尊皇考為孝穆皇帝
皇妣為穆皇后

通典策曰維永初元年七月皇帝謹遣其官某奉策上
皇考尊號曰孝穆皇帝仰惟聖靈邈焉徂遠昔有周丕崇
祚興昌季其在魏晉亦申情禮所以聿追來孝所因者
本謹稽式上代考諸令准稱謂既極情典攸遂所以仰
順天人俯穆率土在心遠慕庶云有慰追尊先后策曰

維年月朔皇帝謹遣某官某奉策上皇妣尊號曰孝穆
皇后伏惟皇妣資坤厚之性體母儀之德等美姜嫄齊
列任姒訓穆中閨化流自遠膺歷運期饗茲天位謹依
前典敬奉大禮仰慕聖善之愛俯增蓼莪之思

齊高帝受禪追尊皇考曰宣皇帝皇妣曰孝皇后

梁書武帝本紀天監元年追尊考曰文皇帝妣曰獻皇
后

陳書高祖本紀永定元年即位追尊考曰景皇帝妣董

氏曰安皇后

通典後魏道武帝稱尊號後追尊遠祖二十餘代皆稱
皇帝則歷代未聞也不復更載謚號焉

北齊文宣帝受東魏禪追尊祖為文穆帝妣為文穆皇
后考為獻武皇帝兄為文襄皇帝母為皇太后

後周閔帝受西魏禪稱天王追尊考曰文王後其弟明
帝立稱帝號追尊文王曰文皇帝後其弟武帝立追尊
曰德皇帝

隋書高祖本紀開皇元年追尊皇考曰武元皇帝妣曰元明皇后

唐書高祖本紀武德元年五月追謚高祖曰宣簡公曾祖曰懿王祖曰景皇帝妣梁氏曰景烈皇后皇考曰元皇帝妣獨孤氏曰元貞皇后

五代史梁本紀太祖開平元年追尊祖考為皇帝妣為皇后皇高祖黯謚曰宣元妣范氏謚曰宣僖曾祖茂琳謚曰光獻妣楊氏謚曰光孝祖信謚曰昭武妣劉氏謚

曰昭懿考誠謚曰文穆妣王氏謚曰文惠

唐本紀莊宗同光元年追尊祖考為皇帝妣為皇后曾祖執宜妣崔氏皆謚曰昭烈祖國昌妣秦氏皆謚曰文景考謚曰武

晉本紀高祖天福元年追尊祖考為皇帝妣為皇后高祖璟謚曰孝安妣秦氏謚曰孝安元曾祖彬謚曰孝簡妣安氏謚曰孝簡恭祖昱謚曰孝平妣來氏謚曰孝平獻考紹雍謚曰孝元妣何氏謚曰孝元懿

漢本紀高祖即位稱天福十二年追尊祖考為皇帝妣
為皇后高祖湍謚曰明元妣李氏謚曰明貞曾祖昂謚
曰恭僖妣楊氏謚曰恭惠祖僖謚曰昭憲妣李氏謚曰
昭穆考璵謚曰章聖妣安氏謚曰章懿

周本紀太祖廣順元年追尊祖考為皇帝妣為皇后高
祖璟謚曰睿和妣張氏謚曰睿恭曾祖諶謚曰明憲妣
申氏謚曰明孝祖蘊謚曰翼順妣韓氏謚曰翼敬考謚
曰章肅妣王氏謚曰章德

宋史太祖本紀建隆元年奉玉冊謚高祖曰文獻皇帝
妣崔氏曰文懿皇后曾祖曰惠元皇帝妣桑氏曰惠明
皇后祖曰簡恭皇帝妣劉氏曰簡穆皇后皇考曰武昭
皇帝

禮志太祖建隆元年九月太常禮院言謹案唐大中初
追尊順宗憲宗謚號皇帝於宣政殿授玉冊遣宰臣以
下持節奉冊赴太廟授冊日帝既御殿百僚拜訖降階
跪授冊於太尉候太尉奉冊出宣政門然後升殿凡皇

帝行禮皆太常卿贊導奉引奏可是月二十七日帝御
崇元殿備禮遣使奉冊上四廟謚號皇帝高祖府君冊
曰孝曾孫嗣皇帝臣某再拜稽首上言伏以昊天有命
皇宋勃興括厚載以開階宅中區而撫運夷夏蠻貊罔
不獻誠山川鬼神罔不受職非臣否德肇此丕圖實賴
先正儲休上玄降鑒既虔膺於大寶乃眇覲於遐源敢
遵歷代之規式薦配天之號皇曾祖府君冊曰伏以天
命匪忱惟歸於有德人文設教必始於貽謀乘時既肇

於興王報本敢稽於尊祖非隆徽稱則大亨何以配神
非鏤良珉則洪烈何由垂世方作猗那之頌永嚴昭穆
之容皇祖驍衛府君冊曰伏以人瞻鳥止運叶龍飛非
發源之長析派不能通上漢非積基之厚嗣孫不能有
中區今人紀肇修孝思罔極酌百王之損益薦四廟之
蒸嘗聖考太尉府君冊曰昔者流火開祥周發薦文王
之號黃星應運曹丕揚魏祖之功咸因致孝之誠式展
尊親之義爰遵大典亟上尊稱禮畢羣臣進表奉慰

遼史文學蕭韓家努傳韓家努為翰林都林牙興宗重
熙十三年春上疏曰臣聞先世遙輦注可汗之後國祚
中絕自額爾欽雅里立阻午大位始定然上世俗樸未
有尊稱臣以為三皇禮文未備正與遙輦氏同後世之
君以禮樂治天下而崇本追遠之義興焉近者唐高祖
尊四世為帝昔我太祖代遙輦即位乃製文字修禮法
建天皇帝名號制宮室以示威服興利除害混一海內
厥後累聖相承自額爾欽呼哩以下大號未加天皇帝

之考額爾欽達魯猶以名呼臣以為宜依唐典追崇四祖為皇帝則陛下弘業有光墜典復舉矣疏奏帝納之始行追冊元德二祖之禮

興宗本紀重熙二十一年秋七月追尊太祖之祖為簡獻皇帝妣為簡獻皇后太祖之考為宣簡皇帝妣為宣簡皇后

金史熙宗本紀天會十四年八月丙辰追尊九代以下祖考妣曰皇帝皇后

禮志天會十四年八月庚戌文武百僚太師宗磐等上
議曰國家肇造區夏四征弗庭太祖武元皇帝受命撥
亂光啟大業太宗文烈皇帝繼志卒伐奮張皇威原其
積德累功所由來者遠矣伏惟皇九代祖廓君人之量
挺御世之姿虞舜生馮遷於負夏太王避狄邑此岐山
聖姥來歸天原肇發皇八代祖皇七代祖承家襲慶裕
後垂芳不求赫赫之名終大振振之族皇六代祖徙居
得吉播種是勤去暴露獲棟宇之安釋負戴興車輿之

利皇五代祖貝勒雄姿邁世美畧濟時成百里日辟之
功戎車既飭著五教在寬之訓人紀肇修皇高祖太師
質自天成德為民望兼精騎射往無不摧始置官師歸
者益衆皇曾祖太師威靈震遠機警絕人雅善運籌未
嘗衿甲臨敵愈奮應變若神皇曾叔祖太師機獨運心
公無私物四方聳動諸部歸懷德威兩隆風俗大定皇
伯祖太師友于盡愛國爾惟忠謀必罔愆舉無不濟累
代祖妣婦道警戒王業艱難俱殫內助之勞實著始基

之漸是宜采羣臣之僉議酌故事以遵行欵帝於郊稱
天以誅請上皇九代祖尊謚曰景元皇帝廟號始祖妣
曰明懿皇后上皇八代祖尊謚曰德皇帝妣曰思皇后
上皇七代祖尊謚曰安皇帝妣曰節皇后上皇六代祖
尊謚曰定昭皇帝妣曰恭靖皇后上皇五代祖貝勒尊
謚曰成襄皇帝妣曰威順皇后上皇高祖太師尊謚曰
惠桓皇帝妣曰昭肅皇后上皇曾祖太師尊謚曰聖肅
皇帝妣曰簡翼皇后上皇曾叔祖太師尊謚曰穆簡皇

帝妣曰靜宣皇后上皇曾叔祖太師尊謚曰孝平皇帝
妣曰貞惠皇后上皇伯祖太師尊謚曰恭簡皇帝妣曰
敬僖皇后須廟室告成涓日備物奉上寶冊藏於天府
施之罔極丙辰奉上九代祖妣尊謚廟號是日百僚上
表稱賀

元史太祖本紀至元三年追謚伊瀨克烈祖神元皇帝

太祖
之父

明史太祖本紀洪武元年追尊高祖考曰元皇帝曾祖

考曰恒皇帝祖考曰裕皇帝皇考曰淳皇帝妣皆皇后
明集禮洪武元年春正月四日太祖詣太廟恭上四
代考妣尊號高祖伯六公五世祖重八公季子妣胡
氏曾祖四九公高祖次子妣侯氏祖初一公懿祖長
子妣王氏考世珍熙祖次子妣陳氏

右追尊

書大禹謨祗載見瞽瞍夔夔齊慄瞽瞍亦允若

蔡傳言舜敬其子職之事以見瞽瞍也齊莊敬也慄

戰慄也夔夔莊敬戰慄之容也舜之敬畏小心而盡於事親者如此允信若順也言舜以誠感格雖瞽瞍頑愚亦且信順之即孟子所謂底豫也

史記五帝本紀舜之踐帝位載天子旗往朝父瞽瞍夔夔唯謹如子道

孟子天下大悅而將歸已視天下悅而歸已猶草芥也惟舜為然不得乎親不可以為人不順乎親不可以為子

朱子章句言舜視天下之歸已如草芥而惟欲得其親而順之也得者曲為順成以得其心之悅而已順則有以諭之於道心與之一而未始有違尤人所難也為人蓋泛言之為子則愈密矣

舜盡事親之道而瞽瞍底豫瞽瞍底豫而天下化瞽瞍底豫而天下之為父子者定此之謂大孝

朱子章句瞽瞍至頑嘗欲殺舜至是而底豫焉書所謂不格姦亦允若是也蓋舜至此而有以順乎親矣

是以天下之為子者知天下無不可事之親顧吾所以事之者未若舜耳於是莫不勉而為孝至於其親亦底豫焉則天下之為父者亦莫不慈所謂化也為孝父慈各止其所而無不安其位之意所謂定也為法於天下可傳於後世非止一身一家之孝而已此所以為大孝也

李氏曰舜之所以能使瞽瞍底豫者盡事親之道共為子職不見父母之非而已昔羅仲素語此云只為

天下無不是底父母了翁聞而善之曰唯如此而後
天下之為父子者定彼臣弑其君子弑其父者常始
於見其有不是處耳

咸丘蒙問曰語云盛德之士君不得而臣父不得而子
舜南面而立堯帥諸侯北面而朝之瞽瞍亦北面而朝
之舜見瞽瞍其容有蹙孔子曰於斯時也天下殆哉岌
岌乎不識此語誠然乎哉孟子曰否此非君子之言齊
東野人之語也堯老而舜攝也堯典曰二十有八載放

勲乃徂落百姓如喪考妣三年四海遏密八音孔子曰
天無二日民無二王舜既為天子矣又帥天下諸侯以
為堯三年喪是二天子矣

朱子章句孟子言堯但老不治事而舜攝天子之事
耳堯在時舜未嘗即天子位堯何由北面而朝乎

咸丘蒙曰舜之不臣堯則吾既得聞命矣詩云普天之
下莫非王土率土之濱莫非王臣而舜既為天子矣敢
問瞽瞍之非臣如何曰是詩也非是之謂也勞於王事

而不得養父母也曰此莫非王事我獨賢勞也

朱子章句不為臣不以堯為臣使北面而朝也

孝子之至莫大乎尊親尊親之至莫大乎以天下養為天子父尊之至也以天下養養之至也詩曰永言孝思孝思維則此之謂也書曰祗載見瞽瞍夔夔齊栗瞽瞍亦允若是為父不得而子也

朱子章句言瞽瞍既為天子之父則當享天下之養此舜所以為尊親養親之至也

蕙田案孟子二章萬古人主尊親之極則

竹書紀年夏帝不降五十九年遜位於弟局

沈氏約注三代之世內禪惟不降實有聖德

史記趙世家趙武靈王二十七年五月大朝於東宮傳
國立王子何以為王王廟見禮畢出臨朝大夫悉為臣
武靈王自號為主父

漢書高祖本紀六年上歸櫟陽五日一朝太公太公家
令說太公曰天亡二日土亡二王皇帝雖子人主也太

公雖父人臣也奈何令人主拜人臣如此則威重不行

後上朝太公擁彗

李奇曰為恭也如令卒持帚也師古曰彗者所以掃也

迎門却

行上大驚下扶太公太公曰帝人主奈何以我亂天下

法於是上心善家令言

師古曰晉太子庶子劉寶云善其發悟已心因得尊崇父號非

善其令賜黃金五百斤夏五月丙午詔曰人之至親莫

親於父子故父有天下傳歸於子子有天下尊歸於父

此人道之極也前日天下大亂兵革並起萬民苦殃朕

親披堅執銳自帥士卒犯危難平暴亂立諸侯偃兵息

民天下大安此皆太公之教訓也諸王通侯將軍羣卿

大夫已尊朕為皇帝而太公未有號今上尊太公曰太

上皇

師古曰太上極尊之稱也皇君也天子之父故號曰皇不預治國故不言帝也蔡邕云不言帝非

天子也索隱曰本紀秦始皇追尊莊襄為太上皇已有故事矣蓋太上者無上也皇者德大於帝

通典註後漢荀悅曰孝經曰故雖天子必有尊也言有父也王者父事三老以示天下所以明孝也無父

猶設三老之禮況其存者乎孝莫大於嚴父故子尊不加於父母家令之言於是過矣晉愍懷太子令問

中庶子劉寶云太公家令說太公為是為非對曰荀悅論貶家令為非臣以為悅不識高帝意高帝雖貴

為天子事父不失子之禮時即位已六年而不加父號是以家令言雖父乃人臣也言無可尊敬名號當

與人臣同禮欲以此感動之帝聞家令言乃悟即立
號太上皇得人子尊父之道若不聞家令言父終無
號矣家令
說是也

蕙田案家令說上之言似與孟子齊東野人
之語相類當時孟子弟子如咸丘蒙尚信不
及何況家令但高祖心存敬父聞言感悟似
家令諷之耳故以高祖心善家令為發悟已
心亦可也

魏書獻文帝本紀帝雅薄時務常有遺世之心欲禪位

於叔父京兆王子推羣臣固請帝乃止皇興五年七月
丙午冊命太子曰昔堯舜之禪天下也皆由其子不肖
若丹朱商均能負荷者豈搜揚側陋而授之哉爾雖冲
弱有君人之表必能恢隆王道以濟兆民今使太保建
安王陸馭太尉源賀持節奉皇帝璽綬致位於爾躬其
踐昇帝位克廣洪業以光祖宗之烈使朕優游履道順
神養性可不善歟丁未詔曰朕承洪業運屬太平淮岱
率從四海清宴是以希心玄古志存澹泊躬覽萬務則

損順神之和一日或曠政有淹滯之失但子有天下歸
尊於父父有天下傳之於子今稽協靈運考會羣心爰
命儲宮踐昇大位朕方優游恭已栖心浩然社稷乂安
克廣其業不亦善乎百官有司其祇奉循予以答天休
宣布寓內咸使聞悉於是羣公奏曰昔三王之世澹泊
無為故稱皇是以漢高祖既稱皇帝尊其父為太上皇
明不統天下今皇帝幼冲萬機大政猶宜陛下總之謹
上尊號太上皇帝乃從之己酉太上皇帝徙御崇光宮

採椽不斷土階而已國之大事咸以聞

北齊武成帝紀即位四年傳位於太子緯自稱太上皇
周書宣帝本紀詔曰有聖大寶實惟重器元天表命人
事與能幽顯同謀確乎不易域中之大寶懸定於杳冥
天下為公蓋不避於內舉我大周感蒼昊之精受河洛
之錫武功文德光格區宇創業垂統永光無窮朕以寡
薄祇承鴻緒上賴先朝得一之迹下藉羣后不貳之心
職貢與雲雨俱通憲章共光華並亘圓首方足咸登仁

壽思隆國本用宏天歷皇太子衍地居上嗣正統所歸
遠憑積德之休允叶無疆之祚帝王之量未肅而成天
祿之期不謀已至朕今傳位於衍乃睠四海深合謳歌
之望俾予一人高蹈風塵之表萬方兆庶知朕意焉可
大赦天下改大成元年為大象元年帝於是自稱天元
皇帝所居稱天臺冕有二十四旒車服旗鼓皆以二十
四為節內史御正皆置上大夫皇帝衍稱正陽宮置納
言御正諸衛等官皆准天臺又令羣臣朝天臺者皆

致齋三日清身一日車旗章服倍於前王之數

文獻通考唐高祖武德九年詔禪位於皇太子稱太上
皇上皇以宏義宮有山林勝境雅好之貞觀三年四月
乃徙居之改為太安宮上屢請上皇避暑九成宮上皇
以隋文帝終於彼惡之乃營大明宮以為上皇清暑之
所未成而上皇寢疾不果居

睿宗在位二年制傳位於太子太子上表固辭上謂太
子曰汝以為天下事重欲朕兼理之耶昔舜禪禹猶親

巡狩朕雖傳位豈忘國家其軍國大事當兼省之八月
庚子玄宗即位尊睿宗為太上皇上皇自稱曰朕命曰
誥五日一受朝於太極殿皇帝自稱曰予命曰制勅日
受朝於武德殿三品以上除授及大刑政決於上皇餘
皆決於皇帝明年上皇誥自今軍國政刑一皆取皇帝
處分朕方無為養志以遂素心是月徙居百福殿

肅宗至德元年即位於靈武尊玄宗曰上皇天帝靈武
使者至蜀上皇喜曰吾兒應天順人吾復何憂制自今

改制勅為誥表疏稱太上皇四海軍國事皆先取皇帝
進止仍奏朕知俟克復上京朕不復預事命韋見素房
瑄崔渙奉傳國寶玉冊詣靈武傳位二年克復兩京使
韋見素入蜀奉迎上皇上皇至鳳翔從兵六百餘人上
皇命悉以甲兵輸郡庫上發精騎三千奉迎十二月丙
午上皇至咸陽上備法駕迎於聖賢宮上皇在宮南樓
上釋黃袍著紫袍望樓下馬趨進拜舞於樓下上皇降
樓撫上而泣上捧上皇足嗚咽不自勝上皇索黃袍自

為上著之上伏地頓首固辭上皇曰天數人心皆歸於
汝使朕得保養餘齒汝之孝也上不得已受之父老在
仗外歡呼且拜上令開仗縱千餘人入謁上皇曰臣等
復覩二聖相見死無恨矣上皇不肯居正殿曰此天子
之位也上固請自扶上皇登殿尚食進食上品嘗而薦
之丁未將發行宮上親為上皇習馬而進之上皇上馬
上親執轡行數步上皇止之上乘馬前引不敢當馳道
上皇謂左右曰吾為天子五十年未為貴今為天子父

乃貴耳左右皆呼萬歲上皇自開遠門入大明宮御含元殿即日幸興慶宮遂居之上累表請避位還東宮上皇不許

順宗永貞元年即位疾不能視事傳位太子純稱太上皇

宋徽宗宣和七年十二月上內禪以道君號退居龍德宮皇太子即皇帝位尊道君為太上皇帝

宋史高宗本紀紹興三十二年六月丙子詔皇太子即

皇帝位帝稱太上皇退處德壽宮

禮志紹興三十二年六月詔上太上皇帝太上皇后尊號集議以聞左僕射陳康伯等言五帝之壽惟堯最高百王之典惟堯獨冠今茲高世之舉視堯有光恭請上太上皇帝尊號曰光堯壽聖太上皇帝太上皇后尊號曰壽聖太上皇后詔恭依仍令禮部太常討論禮儀以聞左僕射陳康伯撰太上皇帝冊文兼禮儀使參政汪澈書冊文并篆寶知樞密院葉義問撰太上皇后冊文

同知樞密院事黃祖舜書冊文八月十四日奉上册寶
是日陪位文武百僚太傅以下行事官並朝服入詣大
慶殿下立班皇帝自內服履袍入御幄服通天冠絳紗
袍出至大慶殿詣冊寶褥位前再拜在位官皆再拜訖
皇帝行發冊寶授太傅之禮如儀禮畢皇帝還幄服履
袍還內文武百僚退儀仗鼓吹備而護衛冊寶太傅以
下行事官導從冊寶至德壽宮皇帝自祥曦殿服履袍
乘輦至德壽宮大次降輦陪位文武官入殿庭立班定

太傅以下行事官從冊寶入殿皇帝服通天冠絳紗袍
升殿詣西向褥位立太上皇帝自宮服履袍即坐皇帝
北向四拜起居訖次太傅以下皆四拜起居次行奉冊
之禮中書令參知政事史浩讀冊攝侍中葉義問讀寶
讀訖退復位皇帝再拜稱賀曰皇帝臣某稽首言伏惟
光堯壽聖太上皇帝陛下冊寶告成鴻名肇正與天同
壽率土均懽皇帝再拜次侍中承旨宣答曰皇帝孝通天
地禮備古今勉受鴻名良深感慰皇帝再拜訖西向立

次太傅以下再拜稱賀致詞曰攝太傅尚書左僕射臣
康伯等稽首言伏惟光堯壽聖太上皇帝陛下肅臨寶
位誕受丕稱獨推天父之尊普慰帝臣之願奏訖再拜
舞蹈次侍中承旨宣答曰光堯壽聖太上皇帝聖旨倦
勤滋久佚老是圖勉受嘉名但增感懃又再拜舞蹈次
太上皇帝降坐入宮皇帝後從壽聖太上皇后冊寶入
宮皇帝詣太上皇后坐前北向立太上皇后升坐皇帝
四拜起居行奉上冊寶之禮讀冊官陳子常讀冊讀寶

官梁康民讀寶讀訖復位皇帝再拜稱賀致詞曰皇帝
臣某稽首言伏惟壽聖太上皇后陛下德茂坤元禮崇
大號寶書翕受歡忭無疆皇帝再拜次宣答官承旨宣
答曰壽聖太上皇后教旨皇帝祓容載藏顯號來膺誠
孝通天但深感惕皇帝再拜訖太上皇后降坐入宮次
太傅以下文武百僚就德壽殿下拜賤稱賀以俟皇帝
服履袍乘輦還內十六日宰臣率文武百僚詣文德殿
拜表稱賀

文獻通考高宗紹興三十二年内禪加上尊號乾道七
年再加上尊號為光堯壽聖憲天體道太上皇帝淳熙
二年再加上尊號為光堯壽聖憲天體道性仁成德經
武緯文太上皇帝是年以聖壽七十行慶壽禮十二年
再加紹業興統明謨盛烈八字十三年以聖壽八十行
慶壽禮赦天下

三十二年六月十一日内禪十二日上詣德壽宮欲以
是日率百官朝太上皇於德壽殿以雨百僚免入見上

就宮中行禮自後上詣宮行禮即不集百官陪十三日
詔令宰臣率百官於初二日十六日詣德壽宮起居又
詔朕欲每日一朝德壽宮面奉慈旨恐廢萬幾煩羣下
不許如前代朔望之禮令禮官重定其期禮部請依漢
高帝五日一朝太公故事每五日一詣德壽宮朝見如
宮中禮從之仍詔自今後詣德壽宮惟經過官司起居
餘並免十七日太上宣諭車駕每至宮必於門外降輦
既行家人之禮自宜至殿上降輦又不須五日一朝只

朝朔望於是有司請除朔望朝拜於每月初八日二十
二日詣德壽宮起居如宮中儀從之自後皆遵此制如
值雨及盛暑祁寒臨期承太上特旨仍免詣十二月冬
至上詣德壽宮稱賀上壽禮畢入見太后如宮中之儀
自後正
至並同乾道元年二月朔上詣德壽宮請太上太后至
延祥觀燒香次幸聚景園次幸玉津園太上聖旨日晚
免車駕從還德壽宮臣僚止從駕還內沿路並免起居
除管軍官從駕外
執政官以下並免以後或恭請幸南內或幸聚景園玉

津園延祥觀靈隱天竺寺其儀並同

皇帝朝德壽宮儀注 前期儀鸞司設大次於德壽宮
門內小次於殿東廊西向其日俟皇帝出即御座從駕
臣僚禁衛等起居如常儀皇帝降御座乘輦將至德壽
宮報文武百僚詣宮門外迎駕起居訖前導官太常卿
閣門官太常博士禮直官先入詣大次前分左右立定
俟皇帝詣德壽宮大次降輦入次御史臺閣門太常寺
報文武百僚入詣殿庭北向立定前導官道皇帝入小

次簾降俟太上皇帝即御座小次簾捲前導官導皇帝
升殿東階詣殿上折檻前奏請拜皇帝再拜訖前導官
導皇帝稍前躬奏聖躬萬福訖導皇帝復位又奏請拜
皇帝再拜訖導皇帝詣太上皇帝御座之東西向立前
導官於殿上隨地之宜少立揖班首以下躬典儀曰拜
贊者承傳曰拜在位官皆再拜訖直身搢笏躬身三舞
蹈跪左膝三叩頭出笏就一拜又兩拜拜訖且躬身班
首不離位奏聖躬萬福訖典儀曰拜贊者承傳曰拜在

位官皆再拜又兩拜拜訖直身立捲班出前導官以次

退

從駕官歸幕次以俟從駕還內

太上皇帝駕興皇帝從入見太上皇

后如宮中之儀訖以俟皇帝還內如來儀

每遇正旦冬至及朔望並

儀
依上

孝宗淳熙二年十一月詔太上皇帝聖壽無疆新歲七十用十一月冬至加上尊號冊寶十二月十七日立春行慶壽禮是日早文武百僚並簪花赴文德殿立班聽宣慶壽赦赦文太極之功不宰其可贊者兩儀之生大

明之照無疆所能推者千載之至欽惟聖父誕保我家
二百餘載而中天定神器於歆側艱虞之始三十六年
而宅位授朕師於康強暇豫之時上穹綿有永之年下
土洽無為之化興言非質日侍慈顏竭幅員之富而未
足伸至養之誠極尊美之稱而未足表難名之德茲載
新於歲律庸展慶於耆齡前殿奉卮企高皇而踵武大
安進膳邁貞觀之彌文鏘金奏以克庭儼臣工而在列
和氣遒周於宇宙盛容創見於古今仍內奉於母儀庸

備殫於子道為酒以介眉壽誕膺純嘏之常立春而下
寬書更廣庶民之富可大赦天下於戲建無窮之基則
享無窮之樂命方卜於萬年有非常之事則侈非常之
休恩益推於四海矧羣黎百姓夙依於覆育而耆老大
夫咸自于甄陶今而仁壽之同躋必也安榮之共保諒
爾有邦之衆知予錫類之心赦書日行五百里敢以赦
前事言者以其罪罪之主者施行宣赦訖從駕官並赴
後殿起居謝花再拜從駕至德壽宮行慶壽禮 陳設

前期儀鸞司陳設德壽宮殿上當中南向設大次於德壽宮內南向小次於殿東廊西向設皇帝褥位二一於御座之東西向一於御座之南北向尚醞設御酒器於御座之東有司又設御茶床於御座之西俱稍北

上壽 其日後殿入內官唱排立俟催班立定

應從駕應奉官

禁衛等並簪花不係從駕官徑赴德壽宮並簪花以俟迎駕起居

閣門報班齊皇帝服

鞞袍出宮門禁衛諸班親從等並迎駕自贊常起居自

贊謝花兩拜

入內省執骨朵使臣迎賀常起居謝花兩拜

皇帝坐知閣門以

下御帶環衛官諸司祇應官等一班鬪班宣名常起居

次贊謝花兩拜訖知閣門官升殿讀奏目

餘官並退

次舍人

引應從駕官一班赴當殿宣名常起居次贊謝花兩拜

執政有奏事如儀皇太子內中起居簪花以俟從駕

次管軍一班宣名次贊謝花

兩拜訖皇帝升輦將至德壽宮文武百僚迎駕常起居贊

謝花兩拜訖前導太常卿閣門官太常博士禮直官并

管軍御帶環衛官等詣大次前分左右立文武百僚入

詣德壽殿下東西相向立俟皇帝至大次降輦入次簾

降簪花服韡袍閣門御史臺太常寺分引皇太子以下應從駕官入詣德壽殿下東西相向立大次簾捲前導

官前導皇帝入小次簾降

前導太常卿閣門官太常博士禮直官并管軍御帶環衛

官等俟太上皇帝出宮迎太上皇帝四拜起居

太上皇帝出宮行門禁衛諸班

親從等迎太上皇帝自贊常起居太上皇帝升御座鳴

鞭小次簾捲前導官前導皇帝升殿東階詣殿上折檻

前北向褥位奏請拜皇帝再拜訖躬奏聖躬萬福訖又

奏請拜皇帝再拜訖前導皇帝詣太上皇帝御座之東

褥位西向立前導官於殿上隨地之宜立閤門御史臺
太常寺分引皇太子并文武百僚並橫行北向立舍人
揖皇太子以下躬典儀曰拜贊者承傳在位官皆再拜
搯笏舞蹈又再拜訖且躬身班首不離位奏聖躬萬福
訖典儀曰拜贊者承傳在位官皆再拜訖直身立分東
西相向立禮直官引奉盤盞參知政事受盤盞參知政
事承旨宣答簽書樞密院事奏禮畢戶部尚書殿中監
少監升殿東階

奉盤盞參知政事受盤盞參知政事殿
中監少監詣酒稍北南向立承旨宣答

簽書樞密院事并奏禮畢戶舍人通樂人姓名已下四
部尚書詣折檻之東西向立

拜起居次看盞人稍前贊拜兩拜贊上殿祇候內特進

御茶牀殿侍酌酒託尚醞典御以盤盞酒注授殿中監

少監次禮直官引奉盤盞叅知政事詣酒樽所北向搢

笏殿中監奉盤盞叅知政事捧盤盞西向立殿中監酌

盞殿中少監以酒注於盞奉盤盞叅知政事奉酒詣皇

帝前北向

禮直官引受盤盞叅知政事詣
太上皇帝御座前西向立定

閣門御史臺

太常寺分引皇太子并文武百僚橫行北向立俟奉盤

參知政事躬進皇帝皇帝奉酒詣太上皇帝御座前躬
進訖少後受盤盞參知政事躬接訖復授奉盤盞參知
政事前導官導皇帝詣御座前褥位北向俛伏跪殿下
皇太子并百僚並躬身皇帝致詞曰皇帝臣名稽首言
天祐君親錫茲難老維春之吉年德加新臣名與羣臣
等不勝大慶謹上千萬歲壽伏興奏請拜皇帝再拜典
儀曰拜贊者承傳在位官皆再拜訖直身立分東西相
向立前導官導皇帝詣御座東西相向立奉盤盞參知

政事以盤北向躬進皇帝訖

奉盤盞叅知政事復位立

皇帝捧盤詣

御座東西向立樂作俟太上皇帝飲酒訖皇帝躬接盞

樂止少後受盤盞叅知政事躬接訖以授尚醞典御各

復位立閣門御史臺太常寺分引皇太子并文武百僚

橫行北向立前導官導皇帝詣褥位北向奏請拜皇帝

再拜典儀曰拜贊者承傳在位官皆再拜訖直身立前

導官導皇帝詣御座之東褥位西向立舍人揖皇太子

已下躬典儀曰拜贊者承傳在位官皆再拜揖笏舞蹈

又再拜訖直身立內侍舉御茶牀禮直官引戶部尚書詣御座前北向俛伏跪奏具官臣某言禮畢伏興退復位立典儀曰拜贊者承傳在位官皆再拜訖直身立分相向立次舍人贊樂人謝祇應兩拜訖太上皇帝駕興皇帝從入宮文武百僚前導應奉官等以次退皇帝皇太子入賀太上皇后於宮中行禮執政率文武百僚拜賤賀太上皇后訖以俟駕興從駕并應奉官禁衛等並簪花從駕還內

建炎以來朝野雜記昭慈聖獻皇后之在建康也有
司月奉千緡而止后生辰別奉緡錢萬時朝廷用度
不給故其禮不及承平時其後顯仁后自北來歸歲

奉錢二十萬緡

月奉萬緡冬年
寒食生辰倍之

帛二萬餘匹

生辰絹
萬匹春

冬端午各三千
匹綾羅二千匹

冬綿五千兩酒日一斗羊三牽高宗

在德壽宮孝宗命有司月供十萬緡高宗以養兵多
費詔減其六萬及孝宗在重華命月進三萬緡而已
上受禪詔太皇太后月奉緡錢二萬皇太后萬五千

上皇太后五萬而重華別給二萬焉

馬氏端臨曰光堯之壽祉壽皇之孝養古今罕儔故具載其事

宋史孝宗本紀贊曰自古人君起自外藩入繼大統而能盡宮庭之孝未有若帝其間父子怡愉同享高壽亦無有及之者終喪三年又能却羣臣之請而力行之宋之廟號若孝宗之為孝其無愧焉

淳熙十六年二月丙上禪皇太子即位移御重華宮上尊號曰至尊壽皇聖帝

紹熙五年光宗以疾不能行喪禮七月憲聖太皇太后

命皇子嘉王即皇帝位尊光宗為太上皇居泰安宮

以內

中寢殿為之

慶元元年上尊號曰聖安仁壽

蕙田案禪位之禮始於唐堯然堯在位時舜攝而已及即位瞽瞍為天子父始有孝養之文書所謂載見瞽瞍夔夔齊慄當是為天子時此舜之大孝然也降及後世父子相繼爰有內禪之舉始於商帝不降趙武靈王而北

魏北周及唐亦踵行之然其儀不詳逮宋三
宗相繼內禪而克全孝道始終無間惟孝宗
稱首其儀備見於文獻通考事雖不常有而
其禮不可軼也若通考兼載事跡始終茲因
與禮無關並削之蓋體例不同爾

右尊太上皇禮

詩大雅大明摯仲氏任自彼殷商來嫁于周曰嬪于京
乃及王季惟德之行大任有身生此文王

史記周本紀季歷娶大任生昌有聖瑞古公曰我世當有興者其在昌乎

國語晉語昔者大任娠文王不變少浚於豕牢而得文王不加疾焉

皇王大紀季歷娶於摯曰大任有賢德目不視窈色耳不聽淫聲口不出惡言容貌恭肅齊如也

列女傳文王生而明聖大任教之以一而識百君子謂大任為能胎教

孔氏穎達曰禮婦人從夫之謚故頌稱大妣為文母
大任非謚也以其尊加於婦尊而稱之故謂之大姜
大任大妣惟武王妃之稱左傳謂之邑姜不稱大蓋
避大姜故也

蕙田案孔氏云尊加於婦故謂之太此稱太
之正義也後人太后之稱實始於此

宗元案對王季而言曰摯仲氏任對文王而
言曰太任有身詩之稱謂一字不苟如此固

非專為其尊加於婦也然後世太后之稱實
始於此則知太姜太任太姒之類皆以其尊
加於婦也亦宜

思齊思齊大任文王之母思媚周姜京室之婦大姒嗣

徽音則百斯男

序思齊文王所以聖也

疏言文王所以得聖由其賢
母所生文王自天性當聖聖

亦由母大賢故歌詠其母言
文王之聖有所以而然也

何氏楷曰徽毛云美也案徽本三糾繩之名琴節亦
曰徽則以琴絃是繩為之故淮南子云鼓琴循絃調

之徽也文選五臣注亦云調也此以徽音連言當即取琴節之義以其音調和可聽謂之美音猶云令聞也

蕙田案賢母之盛莫過於周二篇皆推本言之以明王業所由基後世歸美太后崇上徽號其義實原於此何氏釋徽音字的

文獻通考漢因秦之稱號帝母稱皇太后祖母稱太皇太后

惠帝即位尊呂皇后為皇太后

臨朝稱制

文帝立尊母薄姬為皇太后

姬初為代太后

薄氏侯者一人

景帝立尊母竇皇后為皇太后竇氏侯者三人

武帝立尊母王皇后為皇太后王氏田氏侯者凡三人

昭帝崩霍光迎立昌邑王賀尊上官皇后為皇太后既

廢賀立宣帝尊太后為太皇太后

元帝立尊孝宣王皇后為皇太后成帝即位為太皇太

后王氏列侯者二人關內侯一人

成帝立尊母王皇后為皇太后哀帝即位尊為太皇太

后

哀帝立尊趙后為皇太后趙氏侯者二人又尊定陶共
皇太后為帝太后丁姬為帝太后復又更號帝太
后為皇太后稱永信宮帝太后稱中安宮而成帝母
太皇太后本稱長信宮成帝趙后為皇太后並四太后
各置少府太僕秩皆二千石傅氏侯者六人

蕙田案通考載呂太后臨朝稱制王太后委
政於莽以移漢祚及班氏胡致堂議西京外

戚貽禍之本未詳矣然其失在後而其初固不得謂之非尊親之典也今並削其事變而錄之至定陶太后係私親別詳吉禮門

東漢明帝即位尊陰皇后為皇太后

肅宗即位尊馬皇后為皇太后帝欲封爵諸舅太后不聽

和帝即位尊竇皇后為皇太后臨朝

殤帝立尊鄧皇后為皇太后安帝立猶臨朝政

安帝閭皇后立少帝為皇太后臨朝

順帝梁皇后立冲帝尊為皇太后臨朝質帝立猶秉朝
政

靈帝即位竇太后為皇太后臨朝竇氏誅帝猶以太后有援立之恩朝於南宮親饋上壽供養資奉有加於前
靈帝崩王子辨即位尊母何皇后為皇太后臨朝

魏文帝受禪尊下后為皇太后稱永壽宮明帝即位尊
太后曰太皇太后

明帝立尊郭皇后為皇太后稱永安宮

齊王即位尊郭皇后為皇太后稱永寧宮

晉惠帝即位尊楊皇后為皇太后

東晉成帝即位尊庾皇后為皇太后臨朝稱萬歲

哀帝即位生母章貴人尊為皇太妃

穆帝即位尊褚皇后為皇太后臨朝稱制簡文帝即位

尊后為崇德太后

孝武皇帝即位尊生母李氏為淑妃太元三年進為貴

人九年又進為夫人十二年加為皇太妃十九年尊為
皇太后稱崇訓宮安帝即位尊為太皇太后

通典徐邈與范甯書訪其事甯答謂子不得以爵命
母妃是太子婦號必也正名寧可以稱母也邈重與
甯書曰禮天子之妃曰后關雎稱后妃之德妃后之
名可謂大同所以憲章皇極禮崇物備者在於此也
故太后之號定於前朝而當今所率由也若必欲章
服同於后而名號異於妃則可因夫人之稱而加皇

太以明尊尊雖一理然於文物之章猶未盡崇高之極此又今之所疑不可得行也足下嫌太子妻稱妃然古無此稱出於後代今有皇太之別可例論耶甯又答曰案公羊傳母以子貴當以此義為允禮有君之母非夫人者以此推之王者之母亦何必皆后乎所謂尊母非使極尊號也並后匹嫡譏存春秋謂宜稱皇太夫人下皇后一等位比三公此君母之極號也稱夫人則先后之臣也加皇太則至尊之母也皇

君之謂也君太夫人豈不允乎殷仲堪與徐邈書云
后者婦人之貴號在妻則言后在母則加太禮天子
之妃稱后關雎曰后妃之德后妃二名其義一也設
使皇后處內貴妾必不可稱妃邈又答徐乾書云母
以子貴穀梁亦有其義故曰贈人之母則可又會成
風葬著言禮也但名雖夫人而實如同體故不敢配
厭羣臣無服所服以為異也鄭云近臣從服唯君所
服若嫡夫人歿則有制重者故曰唯君所服之耳與

君同重自施近臣驂僕而下三卿五大夫內有宗廟之祭外有侯伯之命何得以私服廢正故庶母為夫人上之不得以干宗廟外之不得以接侯伯唯國內申其私而崇其儀亦如侯伯子男之臣於內稱君曰公耳雖人君肆情行服而卿大夫不從所以知上有天王也邈往來答釋范武子以詩序云后妃義一是以太妃車旗服章備如太后唯不敢從於宗廟禮又曰百官不稱臣所以合無服之制也范於時都謂不

應同皇后服章以尊議難之自塞矣書傳無天子庶
母之文但妾上無女君夫人可為通稱如五等爵皆
稱公耳天王之與王后未聞二其號者所以關之情
禮而定太妃之稱良有由矣體同王極故上比稱皇
屈於郊廟故遠避伉儷不曰后而曰妃因名求實可
謂至矣禮太后與太妃義無異者假令國君在時妾
自當稱夫人但王典無二名不得以國公夫人為喻
耳

通典太元十九年又詔追崇鄭太后尚書令王珣奏下
禮官詳正案太常臣允等議以春秋之義母以子貴故
仲子成風咸稱夫人經云考仲子之宮明不配食也且
漢文昭二太后並繫子號宜遠准春秋考宮之義近攀
二漢不配之典尊號既正宜改築新廟顯崇尊稱則罔
極之情申別建寢廟則嚴禰之道著繫子為稱兼明貴
之所由一舉而三義以允固哲王之高致可如允等議
追尊會稽太妃為簡文皇太后也

宋武帝受禪尊後母蕭氏為皇太后帝事太后孝謹即位時春秋已高每旦朝太后未嘗失時刻少帝即位尊為太皇太后

孝武即位尊母淑媛為皇太后宮曰崇憲廢帝立為太皇太后明帝立號崇憲太后乃居中宮

廢帝即位尊孝武王皇后為太后宮曰永訓

後廢帝即位尊明帝王皇后為皇太后宮曰弘訓母陳氏尊為皇太妃輿服一如晉孝武李太妃故事宮曰弘

化置家令一人改諸國太妃曰太姬

陳文帝即位尊武帝章皇后為皇太后宮曰慈訓廢帝即位后為太皇太后宣帝立復為皇太后

後主即位尊宣帝柳皇后為皇太后宮曰弘範

後魏太武即位尊明元杜皇后為皇太后封后弟為遼

東王

文成即位尊文成馮皇后為太后聽政獻文孝文時尊曰太皇太后復聽政

明帝即位尊宣武高皇后為皇太后尋為尼居瑤光寺
非大節慶不入宮中尊母胡光華為皇太妃後尊為皇
太后

齊文宣受禪尊母婁妃為皇太后宮曰宣訓濟南即位
尊為太皇太后

後主即位尊武成胡后為皇太后

周武成即位尊母叱奴氏為皇太后

宣帝即位尊武帝后阿史那氏為皇太后大象元年改

為天元皇太后二年又尊為天元上皇太后靜帝立尊
為太后尊母李氏為帝太后大象元年改為天元帝太
后又尊為太皇太后二年又尊為天元聖皇太后靜帝
立尊為大帝太后

靜帝時楊堅秉政尊天元楊后為皇太后居弘聖宮母
朱氏尊為帝太后

唐憲宗立尊順宗王皇后為皇太后

穆宗立尊憲宗郭后為皇太后敬宗立尊為太皇太后

宣宗立尊母鄭妃為皇太后懿宗尊為太皇太后

敬宗立尊穆宗王后為皇太后文宗時稱寶歷太后太和五年宰相建白以太皇太后與寶歷太后稱號未辨前代詔令不敢斥言皆以宮為稱今寶歷太后居義安殿宜曰義安太后詔可

文宗立尊母蕭氏為皇太后太和中懿安太后居興慶

宮

懿宗后文宗祖母

寶歷太后居義安殿

穆宗妃敬宗母

后居內殿

穆宗

妃文宗母號三宮太后帝每五日問安及歲時慶謁率由複

道至南內羣臣及命婦詣宮門候起居

哀帝即位尊昭宗何后為皇太后徙居積善宮號積善太后

蕙田案唐則天武后韋后皆稱太后然妄自尊立非關孝養並削不錄

後唐莊宗即位冊尊母曹氏為皇太后而以嫡母劉氏為皇太妃往謝太后太后有慚色帝既滅梁使人迎太后歸洛陽居長壽宮而太妃獨留晉陽太妃與太后甚

相愛其送太后於洛也涕泣而別

蕙田案莊宗可謂不知禮矣抑亦傷太后之心乎存之可為鑑戒

愍帝即位冊尊明宗后曹氏為皇太后淑妃王氏為皇太妃

晉出帝即位尊高祖后李氏為皇太后

漢愍帝即位尊高祖后李氏為皇太后周太祖入京事太后如母遷於太平宮上尊號曰昭聖皇太后

周恭帝即位尊世宗皇后符氏為皇太后

宋受禪號周太后

宋昭憲皇太后太祖之母帝受禪尊為皇太后

宋史禮志建隆元年詔尊母南陽郡太夫人為皇太后仍令所司追冊四親廟後不果行

文獻通考真宗即位尊太宗明德李后為皇太后居西宮嘉慶殿

宋史禮志至道三年四月尊太宗皇后李氏為皇太后宰臣等詣崇政殿門表賀皇帝又詣內東門表賀皇太

后

乾興元年真宗遺制尊皇后劉氏為皇太后淑妃楊氏
為皇太妃亦不果行冊禮

文獻通考仁宗即位尊真宗莊獻明肅皇后為皇太后
以生日為長寧節出入御大安輦鳴鞭侍衛如乘輿羣
臣上尊號曰應元宗德仁壽慈聖太后元日帝率百官
上壽

天聖二年七月宰臣王欽若等拜表請上皇太后尊號

命宰臣王曾撰冊文參知政事魯宗道書冊實其冊文
曰嗣皇帝臣某謹再拜稽首言恭以為天下之母者愛
育之功博居域中之大者覆載之道均乃有飾盛禮以
推崇因強名而不顯以恩則尊親偕極以義則中外一
詞表德垂鴻非可以缺況乎寧保基緒撫覽權綱格萬
宇之治平副輿情之輸戴式隆稱號以播休鑠伏惟皇
太后陛下聰明淑哲淵穆懿恭襲御龍之遐源啟曾沙
之瑞命輔佐先聖輯睦藩房申翊宮朝協敷閭教服圖

史之至戒慕黃老之微言及正宮承天居尊治內勤儉
之化式於中闡和平之風被於四表王基允固睿問載
融曩者號弓在辰仍几有命粵以大寶付於菲躬旣旣
哀荒懼罔攸濟實賴慈蔭以授洪圖上奉顧托之明俯
慰遐邇之望詳錄機務咨謀政經憲祖宗之舊章厲官
師之凝績本乎子物之惠濟乃守成之業方今蠻夷款
服封宇靖安百度聿修六氣時若肇禋肆類克展上儀
享是休嘉率由保翼故得公卿庶尹藩嶽守臣武旅戎

首緇黃耆艾咸謂周有思齊之什播於聲歌漢有長樂之謡垂於竹帛斟酌前訓擬議盛猷允非鴻名莫揚茂烈綿代曠典自我而著猶且推美而弗有約已以至謙連袂叩閭露草五請臣等以因人之欲拜跪於內甫迴冲慮乃徇公言夫含章履順之謂應元詔詞逮下之謂崇德體仁所以膺壽域之福宣慈所以隆聖善之懿不勝大願謹與百僚士庶奉玉冊琮寶上尊號曰應元崇德仁壽慈聖皇太后伏惟懋協歡心誕膺洪冊承七廟

之流祥受九旻之敷錫擁佑家邦祉祚無極臣某誠歡
誠忭稽首頓首謹言

宋史禮志天聖二年宰臣王欽若等五表請上皇太后
尊號十一月郊祀畢帝御大安殿受冊百官稱賀畢再
序班侍中奏中嚴外辦禮儀使奏發冊寶帝服通天冠
絳紗袍秉珪以出禮儀使閤門使導帝隨冊寶降自西
階內臣奉至殿庭置橫街南東向褥位冊在北寶在南
帝立殿庭北向褥位奉冊寶官奉冊寶案太常卿吏部

禮部侍郎引置當中褥位禮儀使奏請皇帝再拜在位
官皆再拜太尉司徒就冊寶位帝搢珪跪奉冊授太尉
又奉寶授司徒皆搢笏東向跪受興奉冊寶案置於近
東西向褥位禮儀使奏請皇帝歸御幄易常服乘輿赴
文德殿後幄百官班退赴朝堂太尉司徒奉冊寶至文
德殿外幄太尉以下各就次以俟侍中奏中嚴外辦太
后服儀天冠袞衣以出奏隆安之樂行障步障方團扇
侍衛垂簾即御坐南向樂止太常導冊案至殿西階下

各歸班在位者皆再拜太尉押冊司徒奉冊中書令讀
冊訖侍中押寶案司徒奉寶侍中讀寶畢太尉司徒詣
香案前分班東西序立尚宮贊引皇帝詣皇太后坐前
帝服韠袍簾內行稱賀禮跪曰嗣皇帝臣某言皇太后
陛下顯崇徽號昭煥靈瀛伏惟與天同壽率土不勝欣
忭俛伏興又再拜尚宮詣御坐承旨退西向稱皇太后
答曰皇帝孝思至誠貫於天地受茲徽號感慰良深帝
再拜尚宮引歸幄太尉率百官稱賀奏隆安之樂太后

降坐還幄樂止侍中奏解嚴所司放仗百官再拜退太后還內內外命婦稱賀太后皇帝於內殿在外命婦及兩京留司官並奉表稱賀自是上皇太后尊號禮皆如之

文獻通考宋章獻太后遺詔以皇太妃楊氏為皇太后即所居殿號曰保慶太后

英宗即位尊仁宗慈聖光獻皇后為皇太后神宗立尊為太皇太后名宮曰慶壽

宋史禮志熙寧二年神宗尊皇太后曹氏為太皇太后
詣文德殿跪奉玉冊授攝太尉曾公亮金寶授攝司徒
韓絳又跪奉皇太后高氏玉冊授攝太尉文彥博金寶
攝司徒趙抃禮畢百官稱賀

文獻通考神宗立尊英宗宣仁聖烈皇后為皇太后居
寶慈宮哲宗嗣位尊為太皇太后以生日為坤成節

哲宗立尊神宗欽聖憲肅皇后為皇太后尊生母朱德
妃為皇太妃時宣仁欽聖二太后皆居尊故稱號未得

極其至元祐三年宣仁詔母以子貴輿蓋仗衛冠服悉倖皇后

宋史禮志哲宗即位詔尊太后高氏為太皇太后皇后向氏為皇太后德妃朱氏為皇太妃禮部議皇太妃生日節序物色其冠服之屬如皇后例稱慈旨慶賀用箋太皇太后皇太后於皇太妃稱賜皇帝稱奉百官不稱臣皇帝問皇太妃起居用箋皇太妃答皇帝用書宰臣請特建太皇太后宮曰崇慶殿曰崇慶曰壽康皇太后

宮曰隆祐殿曰隆祐曰慈徽元祐二年詔太皇太后受
冊依章獻明肅皇后故事皇太后受冊依熙寧二年故
事皇太妃與皇太后同日受冊令太常禮官詳定儀注
右諫議大夫梁燾請對文德殿太皇太后曰大臣欲行
此禮予意謂必難行燾對曰誠如聖慮願堅執勿許且
母后權同聽政蓋出一時不得已之事乞速罷之中書
舍人曾肇亦言太皇太后聽政以來止於延和殿受遼
使朝見亦止於御崇政殿未嘗踐外朝今皇帝述仁祖

故事以極崇奉之禮太皇太后儻以此時特下明詔發揚皇帝孝敬之誠而固執謙德止於崇政殿受冊則皇帝之孝愈顯太皇太后之德愈尊兩義俱得顧不美歟太皇太后欣然納之迺詔將來受冊止於崇政殿尋以天旱權罷未幾太師文彥博等以時雨溥澍稼穡有望請舉行冊禮凡三請乃從九月六日發太皇太后冊寶於大慶殿發皇太后太妃冊寶於文德殿行禮如儀紹聖元年詔奉太皇太后旨皇太妃特與立宮殿各坐

六龍輿張繖出入由宣德正門有司請應宮中並依稱臣妾外命婦入內準此百官拜箋稱賀稱殿下徽宗即位加哲宗太妃號曰聖瑞既又御文德殿冊命元符皇后劉氏為太后並依皇后禮制

文獻通考徽宗立尊哲宗元符皇后為皇太后殿為崇恩宮

欽宗既受禪尊徽宗顯肅皇后為太上皇后遷居寧德宮稱寧德太后

靖康二年二帝北狩金人僭立張邦昌邦昌迎哲宗元祐皇后入禁中垂簾聽政后遣使迎康王降手書播告天下王即位於南京后撒簾上尊后為元祐太后奉迎至行在所以元字犯后祖諱改稱隆祐太后

高宗既即位遙尊母韋賢妃為宣和皇后紹興十年遙上皇太后冊寶於慈寧殿自後每遇誕日至朔皆遙行賀禮十二年八月自北歸至臨安入居慈寧宮

宋史禮志建炎元年五月冊元祐皇后為隆祐太后令

所司擇日奉上冊寶時方巡幸不克行禮遙尊韋賢妃
為宣和皇后紹興七年三月詔略曰宣和皇后夙擁慶
羨是生眇冲迺骨肉之至親偕父兄而時邁十年地阻
懷陟岵凱風之思萬里使還奉上皇寧德之諱宜尊為
皇太后令所司擇日奉上冊寶太常寺言請依祖宗故
事俟三年之喪終制然後行禮時翰林學士朱震言唐
德宗建中上太后沈氏尊號時沈太后莫知所在猶供
張含元殿具袞冕出左序立東方再拜奉冊今太后聖

體無恙信使相望豈可不舉揚前憲臣又聞三年之制
惟天地社稷越紼行事德宗以大歷四年即位明年改
元建中時行易月之制故以冕服行事今陛下退朝之
服盡如禮制謂當供張別殿遣三公奉冊藏於有司恭
俟來歸願下禮官請明詔從之禮部太常言寶文欲乞
以皇太后寶四字為文合差撰冊文官一員書冊文官
一員書篆寶文官一員並差執政十年營建皇太后宮
以慈寧為名十二月帝自常御殿詣慈寧殿遙賀皇太

后奉上冊寶十二年八月皇太后還慈寧宮十月十八日奉進冊寶其日張設慈寧殿設坐殿中皇太后服褱衣即御坐本殿官設冊寶於殿下慈寧宮事務官并本殿官並朝服詣殿下再拜搢笏舉冊寶奉進先進冊次進寶進畢降坐易褱衣服常服皇帝詣慈寧殿賀如宮中儀次宰臣率百僚拜表稱賀

文獻通考孝宗既受禪尊憲聖皇后為皇太后居德壽宮上尊號曰壽聖太上皇后每遇誕節上詣宮上壽至

朔望朝上皇畢入見后如宮中之儀乾道七年加壽聖
慈明尊號淳熙二年以上皇慶壽禮又加號壽聖齊明
廣慈十年后年七十行慶壽禮十三年加尊號備德二
字上皇崩遺詔改稱皇太后上欲迎還大內太后不許
因築本殿名慈福光宗即位后當為太皇太后以壽皇
故更號曰壽聖皇太后紹熙四年慶壽八十加號隆慈
備福孝宗崩始稱太皇太后寧宗慶元元年加尊號光
祐二字二年遷居重華宮易名曰慈福

容齋隨筆唐德宗即位訪求其母沈太后歷順宗及
憲宗時曾祖母故稱為曾太皇太后蓋別於祖母也
舊新二唐書紀皆載之今慈福太皇太后在壽康太
上時已加尊稱若於主上則為曾祖母當用唐故事
加曾字向者嘗已告宰相而省吏以為典故所無天
子逮事三世安得有前比亦可謂不知禮矣又嗣濮
王士歆在隆興為從叔祖在紹熙為曾叔祖慶元為
高叔祖矣而仍稱皇叔祖如故士歆視嗣秀王伯圭

為從祖今主稱皇伯祖而歆但為皇叔祖乃是弟爾
禮寺亦以為國朝以來無稱曾高者彼蓋不知累朝
尊屬元未之有也

光宗既受禪上成肅皇后尊號曰壽成皇后孝宗崩上
皇太后尊號慶元初加號惠慈嘉泰二年上太皇太后
尊號寧宗既即位尊慈懿皇后為皇太后退居壽康宮
慈惠殿上尊號曰壽仁

續文獻通考理宗即位尊楊皇后曰皇太后同聽政實

慶三年上尊號曰壽明皇太后紹定元年加上慈睿三年又加仁福

宋會要寶慶二年十二月詔皇太后宜上尊號曰壽明皇太后有司詳具儀注朕當親率羣臣詣慈明殿奉上冊寶甲申以史彌遠為奉上皇太后尊號冊寶禮儀使并撰冊書冊宣繒篆寶

紹定三年十二月詔曰壽明慈睿皇太后載安宗社兼體乾坤宜加上尊號曰壽明仁福慈睿皇太后其令有

司詳具儀注朕當親率羣臣詣慈明殿奉上冊寶

續文獻通考度宗即位尊皇后謝氏曰皇太后咸淳三年上尊號曰壽和皇太后五年加上聖福恭帝即位尊為太皇太后

宋會要咸淳三年詔朕纂承丕緒郊見禮備載典冊皇太后合上尊號可令有司討論以聞宰執奏皇太后尊號恭擬壽和二字詔於五年加上壽和皇太后尊號曰壽和聖福皇太后

續文獻通考恭帝即位尊母金皇后為皇太后

端宗即位母楊淑妃為太后

遼太祖尊母蕭氏為皇太后太宗即位尊為太皇太后
太宗尊母蕭氏為應天皇后會同初晉使馮道韋勳
上尊號曰廣德至仁昭烈崇簡

世宗即位尊母蕭氏為皇太后

義宗之妃

聖宗即位尊母蕭氏為皇太后攝國政統和元年上尊
號曰承天太皇后二十四年加上尊號曰睿德神略應

運啟化

契丹國志尚有法道弘仁聖武開統八字

興宗即位母元妃蕭氏自立為太后攝政重熙元年上尊號曰法天應運仁德章聖二十三年加上尊號曰仁慈聖善欽孝廣德安靜貞純懿和寬厚崇覺儀天道宗立尊為太皇太后

道宗即位尊母蕭氏為皇太后清寧二年上尊號曰懿懿仁和文惠孝敬廣愛宗天

契丹國志徽號睿聖從慈順天與史不同

遼史禮志冊皇太后儀前期陳設於元和殿如皇帝

受冊之儀至日皇帝御弘政殿冊入侍從班入門外金
吾列班文武分班侍中解劍奏中嚴宣徽使請木契喚
仗皆如之樂工入閣使門外文武班中間立喚承宣官
聲喏趨至閣使後立閣使鞠躬立揖稱奉敕喚仗承受
官鞠躬聲喏揖引聲奉敕喚仗文武合班再拜殿中監
押仗入文武班入亦如之宣徽使同內諸司供奉官天
橋班候皇太后御紫宸殿乘平頭輦童子女童隊樂引
寶金鑾門閣使奏內諸司起居訖贊引駕自下先引至

元和殿皇太后入西北隅閣內更衣侍中解劍上殿奏
外辦宣徽受版入奏侍中降復位協律郎舉麾樂作大
樂令太常卿導引皇太后升坐宣徽使贊扇合捲簾扇
開樂止符寶郎奉寶置皇太后坐右左右金吾大將軍
對揖鞠躬奏軍國內外平安東上閣門副使引丞相東
門入西閣門副使引親王西門入通事舍人引文武班
入如儀樂作至位樂止文武班趨進相向再拜退復佾
東西上閣門使宣徽使自弘政殿引皇帝御肩輿至西

便門下引入門樂作至殿前位樂止皇帝拜舞蹈拜訖
引西階上殿至皇太后坐前位俛跪致詞訖俛伏興引
西階下至殿前位拜舞蹈拜鞠躬侍中臨軒宣太后答
稱有制皇帝再拜宣訖引皇帝上殿樂作至西閤樂止
丞相親王從文武合班再拜舞蹈三呼萬歲如儀丞相
上賀侍中宣答如儀丞相以下出舉樂出門樂止侍中
奏禮畢宣徽索扇扇合下簾皇太后起舉樂入閤樂止
文武官出門外分班侍從兵部吏部起居金吾仗出如

儀間使奏放仗皆如皇帝受冊之儀

續文獻通考金熙宗天會

仍太宗年號

十三年尊太祖后赫

舍哩氏為太皇太后尊太宗后唐古氏為太皇太后

海陵天德二年尊嫡母圖克坦氏為皇太后尊生母大氏

為皇太后

章宗即位尊母圖克坦氏為皇太后

顯宗之妃

哀宗即位尊母皇后溫都氏為皇太后生母元妃

氏為皇太后

金史禮志冊皇太后儀 其日質明有司各具繖扇侍衛如儀及兵部約量差軍兵并文武百官詣兩宮迎請引導皇太后入內並赴受冊殿入御幄侍衛如式次奉冊太尉等俱以冊置於案奉寶司徒等俱以寶置於案皆盛以匣覆以帕詣別殿門外幄次教坊提點率教坊入侍衛官各就列皇帝常服乘輿至別殿後幄次通事舍人引宣徽使版奏中嚴復位少頃又奏外辦幄簾捲教坊樂作扇合兩宮皇太后出自後幄並即御坐南向

扇開樂止分左右少退通事舍人引文武百僚班左入依品重行西向立定通事舍人喝起居班依常朝例起居七拜訖引文武百僚班分東西相向立通事舍人太常博士贊引太常卿前導押冊官押冊而行奉冊太尉讀冊中書令舉冊官等以次從之押寶官押寶而行奉寶司徒讀寶侍中舉寶官等以次從之俱自正門入教坊樂作至殿庭西階下少東北向於褥位少置樂止冊止寶南通事舍人太常博士贊引太常卿前導押冊官

押冊升樂作奉冊太尉等從之進至兩宮太后座前褥

位樂止

兩宮冊寶齊上齊讀

舉冊官夾侍奉冊太尉各搢笏北向

跪俛伏興退立讀冊中書令俱進向冊前跪奏稱攝中

書令具官臣某謹讀冊舉冊官單跪對舉中書令各搢

笏讀訖執笏俯伏興搢笏捧冊興於位東迴冊函北向

並進跪置於御座前褥位中書令舉冊官俱降還位奉

冊太尉並降階東向以俟押寶官押寶升樂作奉寶司

徒等從之進至兩宮皇太后座前褥位樂止舉寶官夾

侍奉寶司徒各搢笏北向跪俛伏興退立讀寶侍中俱
進當寶前跪奏稱搢侍中具官臣某謹讀寶舉寶官單
跪對舉侍中各搢笏讀訖執笏俯伏興搢笏捧寶興於
位東迴寶西北向並進跪置御座前褥位冊之南通事
舍人太常博士贊引太尉司徒以次應行事官俱降自
西階復本班序立宣徽使一員詣皇帝御幄前俛伏跪
奏臣某謹請皇帝詣兩宮皇太后前行稱賀禮俛伏興
贊引皇帝再拜又奏請北向跪皇帝賀曰嗣皇帝臣某

云云俛伏興又再拜訖又奏請皇帝少立內侍承旨退
西向稱兩宮太后旨云云皇帝再拜宣徽使前引皇帝
歸幄常服乘輿還內侍衛如來儀應階下文武百僚重
行立定通事舍人喝拜在位皆再拜通事舍人引太師
升俛伏跪奏稱文武具官臣某等稽首言皇太后殿下
顯對冊儀永安帝養仰祈福壽與天同休俛伏興降自
西階復位立定通事舍人贊在位官皆拜舞蹈三稱萬
歲又再拜宣徽使升自東階取旨退臨階西向稱兩宮

皇太后旨通事舍人贊在位官皆再拜畢宣曰公等忠敬盡心推崇協力膺茲令典感媿良深宣訖還位通事舍人贊謝宣諭拜在位官皆再拜舞蹈三稱萬歲又再拜通事舍人分引應北向官各分班東西立宣徽使升自東階奏稱具官臣某等言禮畢降還位扇合皇太后並興教坊樂作降座還殿後幄次扇開樂止通事舍人引宣徽使奏解嚴中書侍郎等各帥捧冊牀官升殿跪捧冊並置於牀次門下侍郎等各帥捧寶牀官升殿跪

捧寶並置於牀訖通事舍人引詣東上閤門投進所司
文武百僚以次出皇太后常服乘輿各還本宮引導如
來儀文武百僚詣東上閤門拜表賀皇帝退禮畢各赴
本宮受內外命婦稱賀所司預於殿內設皇太后御座
司賓引內外命婦於殿庭北向依接前序立尚儀奏請
皇太后常服即座司贊曰再拜命婦皆再拜司賓引班
首詣西階升跪賀稱妾某氏等言伏惟皇太后殿下天資
聖善昭受鴻名凡在照臨不勝欣忭興降階復位司贊

曰再拜內外命婦皆再拜尚宮乃宣答曰膺茲典禮感愧良深司贊曰再拜在位者皆再拜退赴別殿賀皇帝亦如賀皇太后之儀惟不致詞不宣答

續文獻通考元成宗即位尊太母元妃必濟額格齊瀉

吉哩氏

裕宗之妃

為皇太后

武宗即位尊太母元妃達吉瀉吉哩氏

順宗之妃

為皇太后

至治三年上尊號曰儀天興聖慈仁昭懿壽元仁宗延祐二年加上尊號曰全德泰寧福慶英宗即位尊為太

皇太后加上尊號曰徽文崇祐

英宗即位尊母鴻吉哩氏為太后

寧宗即位尊文宗皇后鴻吉哩氏為皇太后順帝元統二年上尊號曰贊天開聖仁壽徽懿昭宣至元元年尊為太皇太后加上尊號曰貞文慈祐儲善衍慶福元

元史禮志太皇太后上尊號進寶冊儀 前期二日儀鸞司設進發冊寶案於大明殿御座榻前掌謁設進冊寶位於太皇太后殿座榻前設受冊寶案於座榻上並冊

西寶東侍儀司設冊使副位於廷中北面冊官位右寶官位左禮儀使位於前以北為上太皇太后殿廷亦如之至期大昕羣臣皆公服叙位闕前侍儀使禮儀使引冊使引冊奉冊舉冊讀冊捧冊官由月華門入侍儀使禮儀使引冊副引寶奉寶舉寶讀寶捧寶官由日精門入至露階下依板位立侍儀使捧牙牌入至寢殿前跪報外辦內侍入奏出傳制曰可侍儀使俛伏興皇帝出閣升輦鳴鞭三入大明殿陞御座鳴鞭三司晨報時雞

唱畢侍儀使禮儀使引冊使以下陞自東階由左門入至御榻前相向立掌儀贊曰奏中嚴侍儀使捧牙牌跪奏曰中嚴又贊曰就拜曰興平身復位曰禮儀使稍前跪曰冊使以下皆跪禮儀使奏請進發太皇太后冊寶掌儀贊曰就拜曰興平身曰復位曰內謁者稍前曰搢笏曰內謁者跪進冊寶皇帝興以冊授冊使跪受興以授捧冊官出笏授捧冊官出笏以寶授冊副跪受興以授捧寶官出笏侍儀使禮儀使引冊引寶官導冊寶由正門出冊使以

下奉隨至階下掌儀贊曰以冊寶置於案曰出笏復位
方輿昇行樂作侍儀使禮儀使引冊引寶前導冊使以
下奉隨至興聖宮前奠案樂止侍儀使以導從入至太
皇太后寢殿前跪報外辦掌謁入啟出傳旨曰可侍儀
使俛伏興侍儀使掌謁前導太皇太后升殿導太皇太
后時侍儀使入至大明殿跪奉冊寶至興聖宮請行禮
駕興鳴鞭三侍儀使前引導從至興聖宮陞御座侍儀
使出至案所樂作方輿入至露階下奠案冊使副立於

案前丹官東向寶官西向方輿分退立於兩廡樂止尚
引引殿前班入起居位相向立起居拜舞如元正儀禮
畢宣贊唱曰各恭事贊引丹使以下退至起居位通班
舍人唱曰攝某官具官

或太尉具官無常

臣某以下起居引贊

贊曰鞠躬平身進入丹墀知班唱曰班齊宣贊唱曰拜
通贊贊曰鞠躬拜興拜興平身宣贊唱曰各恭事進至
案前依位立宣贊唱曰太尉以下進上丹寶掌儀贊曰
捧丹寶官前搢笏捧丹寶侍儀使引丹寶官前導丹使

奉隨至御榻進冊寶案前掌儀唱曰跪捧冊寶官皆跪
曰以冊寶置於案曰捧冊寶官出笏復位曰太尉以下
皆跪曰讀舉冊寶官興俱至案前跪掌儀贊曰舉冊官
搢笏取冊於匣置於盤對舉曰讀冊讀冊官稱臣某謹
讀冊讀畢舉冊官納冊於匣掌儀唱曰出笏曰舉寶官
搢笏取寶於盃對舉曰讀寶讀寶官稱臣某謹讀寶讀
畢舉寶官納寶於盃掌儀贊曰出笏曰就拜曰興平身
曰復位曰太尉司徒奉冊寶官稍前曰捧寶冊官稍前

曰搢笏捧冊寶上進曰皇帝躬授太皇太后冊寶太皇太后以冊寶授內掌謁掌謁置於案皇帝興進酒太皇太后舉觴飲畢皇帝復御座畢掌儀贊曰衆官皆復位侍儀使引冊使以下分左右出就位皇帝率皇后及諸妃公主降丹墀北面拜賀陞殿皇太子及諸王拜賀升殿典引引百官入就起居位通班舍人唱曰文武百僚具官臣某以下起居曰鞠躬曰平身引至丹墀拜位知班報班齊宣贊唱曰拜通贊贊曰鞠躬拜興拜興平身

侍儀使詣班首前請進酒雙引至殿宇下褥位立俟舞旋列定通贊唱曰分班樂作侍儀使引班首由南東門入宣徽使奉隨至御榻前班首跪曲終班首祝贊曰冊寶禮畢臣等不勝欣忭願上太皇太后皇帝萬萬歲壽宣徽使應曰如所祝班首俛伏興還詣進酒位

以下並同元正

儀

皇太后上尊號進冊寶儀

同前儀

太皇太后加上尊號進冊寶儀

同前儀

續文獻通考明惠帝建文元年尊母妃呂氏興宗妃為皇

太后

宣宗即位尊母皇后張氏為皇太后英宗即位尊為太
皇太后

英宗即位尊母皇后孫氏為皇太后景帝時尊為上聖
皇太后英宗復辟上徽號曰聖烈慈壽

景帝即位尊母賢妃吳氏為皇太后

憲宗即位尊母皇后錢氏為慈懿皇太后尊生母貴妃

周氏為皇太后成化時上尊號曰聖壽慈仁孝宗即位尊為太皇太后

孝宗即位尊母皇后王氏為皇太后武宗即位尊為太皇太后

武宗即位尊母皇后張氏為皇太后正德五年上尊號曰慈壽世宗入繼稱聖母加上尊號曰昭聖嘉靖三年加上康惠已改稱皇伯母十五年復上恭安

世宗即位尊祖母邵氏

憲宗妃
睿宗母

為皇太后嘉靖七年上

尊號曰壽安七年改稱太皇太后十五年改稱皇后又
尊生母蔣氏睿宗妃為興國太后嘉靖三年上尊號曰本
生章聖皇太后去本生號尊為聖母七年上尊號曰慈
仁十五年加上康靖貞壽

神宗即位尊母皇后陳氏為仁聖皇太后萬曆六年加
上徽號曰貞懿十年再加康靜又尊生母貴妃李氏為
慈聖皇太后萬曆六年加上徽號曰宣文十年再加明
肅二十九年加貞壽端獻三十四年加恭熹

明史禮志上尊號徽號儀 天子登極奉母后或母妃
為皇太后則上尊號其後或以慶典推崇皇太后則加
二字或四字為徽號上徽號致詞而上尊號則止進冊
寶上尊號自洪熙元年六月宣宗登極尊皇太后始其
儀先期遣官祭告天地宗廟社稷帝親告太宗皇帝大
行皇帝几筵是日鳴鐘鼓百官具朝服前一日內侍官
於奉天門設冊寶綵輿香亭教坊司設中和韶樂及大
樂設而不作清晨內官設皇太后寶座於宮中陳儀仗

於丹陛及丹墀設冊寶案香案於寶座前設皇帝拜位
於丹陛上正中親王拜位於丹墀內女樂設而不作皇
帝具冕服御奉天門冊寶官以冊寶置綵輿中內侍舉
輿皇帝隨輿降階陞輅百官於金水橋南北向立輿至
皆跪過輿隨至思善門外橋南北向立皇帝至思善門
內降輅皇太后陞座輿至丹陛上皇帝由左門入至陛
右北向立親王具冕服各就位奏四拜皇帝及親王以
下皆四拜畢奉冊寶官以冊寶由殿中門入立於左皇


帝由殿左門入至拜位跪親王百官皆跪奏摺圭奏進
丹奏冊官以冊跪進於皇帝右皇帝受冊獻訖以授執
事官執事官跪受置案左奏進寶奉寶官以寶跪進於
皇帝右皇帝受寶獻訖以授執事官執事官跪受置案
右奏出圭奏宣冊執事官跪宣讀皇帝俯伏興由左門
出至拜位奏四拜傳唱百官同四拜禮畢駕興是日皇
帝奉皇太后祇謁奉先殿及太宗皇帝大行皇帝几筵
行謁謝禮禮畢皇太后還宮服燕居冠陞座皇帝率皇

后皇妃親王公主及六尚等女官行慶賀禮翌日外命婦四品以上行進表箋禮宣德以後儀同英宗初年二月上太皇太后尊號儀同天順八年二月增命婦致詞云某夫人妾某等恭惟皇太后陛下尊居慈極永膺福壽太皇太后同弘治十八年上兩宮尊號改皇太后致詞云尊處慈闈茂隆福壽嘉靖元年二月上昭聖皇太后皇嫂莊肅皇后壽安皇太后興獻后尊號以四宮行禮過勞分為二日又以武宗服制未滿莊肅免朝賀命

婦賀三宮亦分日昭聖致詞云功德並隆永膺福壽興
獻同壽安云尊居慈極永膺福壽上徽號自天順二年
正月奉皇太后始致詞云嗣皇帝臣伏惟皇太后陛下
功德兼隆顯崇徽號永膺福壽率土同歡命婦進表慶
賀致詞曰某夫人妾某氏等恭惟皇太后陛下德同坤
厚允協徽稱壽福無疆輿情歡戴餘如常儀後上徽號
及加上徽號仿此成化二十三年禮部具儀上未及皇
太子妃禮特命增之

右上帝太后太皇太后尊號

徽號禮



五禮通考卷一百四十二